




茅卅一
 文山集
 先天集
 白石樵唱集
 山民集
 水雲集

卅一

柳田文庫
 文庫11
 D 156
 31



文庫11
D156
31

文山詩鈔

八四

文天祥生時夢紫雲故名雲孫天祥其字也寶祐乙卯以字貢遂改字宋瑞又字履善吉州廬陵人廷對第五理宗擢第一歷官較書著作郎至兼學士國史院崇政殿說書玉牒所檢討賈似道以致仕要君降詔多諷語逆賈意奏免始闢文山以居旋起提刑湖南移知贛州德祐乙亥元兵渡江奉詔起兵除右文殿樞密權兵部侍郎兵屯洪詔入衛權工部尚書除浙東西制置使江西安撫大使兼知平江府常州破朝議棄平江趨天祥移守餘杭進資政殿學士丙子正月伯顏兵至高亭陳宜中張世傑皆遁乃除右丞相兼樞密至北軍講解遂為所留而臨安降表已出伯顏即脅隨祈請使北行至

文山詩鈔

仰日錄文庫

010190554339

08-12202

京口脫走趨真州謀合兩淮作興復計而制置李庭芝
疑拒之復從揚州逃至高郵峴崎數瀕死得渡海道至
台溫奉益王於福州改元景炎除觀文殿學士右丞相
不拜以樞密使都督諸路軍事出南劍號召天下繇汀
漳入梅州戰雩都大捷因開府興國元兵大至旋潰妻
妾子女皆陷奔汀移循州端宗崩衛王立於劔川改元
祥興天祥乞移軍入朝而宜中世傑忌阻之弟加少保
信國公張弘範破崖山令弘正襲執天祥服腦子二兩
不死繫至燕不屈囚兵馬司者四年而志愈堅會有中
山薛寶住投匿名書指丞相舉事者司天又奏三台
星折乃召至殿中猶欲諭降之語益厲遂遇害衣帶有
贊曰孔曰成仁孟曰取義惟其義盡所以仁至讀聖賢

書所學何事而今而後庶幾無愧詩集不多有指南錄
卷皆奉使脫難興復記事之詩又有吟嘯集則囚燕
所作又獄中集杜詩二百首自指南錄以後與初集格
力相去殊遠志益憤而氣益壯詩不琢而日工此風雅
正教也至其集杜句成詩裁割鑄巧合自然尤千古
擅場今別爲一帙而以指南錄中十八拍附之嗚呼去
今幾五百年讀其詩其面如生其事如在眼者此豈求
之聲調字句間哉

敬和道山堂慶瞻御書韻

墨灑天奎映籀紅斯堂殿閣與俱隆方壺圓嶠神仙宅溫
洛築河造化工列聖文章千載重諸孫聲氣一時同著庭
更有邦人筆稽首承休學二忠著作之庭乃胡忠簡公書

贈祕書王監丞

君不見祕書外監賀放翁鏡湖一曲高清風又不見太子
師傅兩疏氏東門祖帳羅羣公人生晚節良不易頽波直
下誰障東使人知有在我者二三君子爲有功我公金華
山下住赤松安期白雲處風骨細瘦真神仙急流勇退不
肯顧我昔山中想風采幾回擊節歸田疏適來追陪水蒼
佩親見辭歸白雲路御筆擢公領蓬山師表玉立東宮官
兩年苦口一去字未許鷗鷺從公閒瑤池深深鎖策府玉
皇宮闕僑其間暫分赤符管下界半空雲氣常往還多少
持麾辭上國悠悠風塵見此客莫作尋常太守看疏賀以
來偉人物夜瞻婺女次舍中一點光明射南極公歸眠食
重調護世道尚憑公氣力

贈蒲陽卓大著順寧精舍三十韻

人生天地間一死非細事識破此條貫八九分地位趙岐
圖壽藏杜牧擬墓志蔡文潛自撰荷鍾伶常醉此等蛻浮
生見解已不易齊物逍遙遊大抵蒙莊意聖門有大法學
者必孔自知生未了了未到知死地原始則返終終始本
一致後來得西銘精蘊發洙泗吾體天地塞吾氣天地帥
一節非踐形終身莫繼志舜功禹顧養參全穎錫類伯奇
令無違申生恭不貳聖賢當其生無日不惴惴彼豈不大
觀何苦勤興寐吾順苟不虧吾寧始無愧人而有所黍曠
達未足智卓哉居士翁方心不姿媚蒙讒以去國七年無
怨懟風雨三間茅松楸接蒼翠斯丘亦樂哉未老先位置
宇宙如許大豈以爲敵屣當其歸去來致命聊自遂天之

生賢才初意豈無爲民胞物同與何莫非已累君方任於
朝名高貴所萃乾坤父母身方來日川至西銘一篇書順
事爲大義請君觀我生姑置末四字

贈鏡湖相士

五月五日楊子江心水鑄作道人雙瞳子吾面碟子大安
用鏡照二百里

贈秋月葉相士

急流勇退神仙跛蹙龍鐘將相借問華山山中何似天津
橋上

贈桂巖楊相士

榮悴紛紛未可期夕多未振已朝披德剛難免於今世行
好須看有驗時萱晝堂前惟有母槐陰庭下豈無兒好官

要做無難做身後生前是兩岐

宣州罷任再贈

貧賤元無富貴思泥塗滑滑總危機世無徐庶不如卧見
到淵明便合歸流落丹心天官未擘矚青眼古來稀西風
爲語巖前桂若更多言却又非

贛州再贈

此別重逢又幾時贈君此是第三詩衆人皆醉從教酒獨
我無爭且看棋凡事誰能隨物競此心只要有天知自知
自有天知得切莫逢人說項斯

贈葉大明

大明標榜葉氏子自稱後村門下士誤言木吉字爲災後
村曾發一笑來其師流傳說如此寧知禍福乃不爾犀腰

貂首徒勞人甘藜藜養無苦辛
我生有命殊六六木李循
環相起伏袖中莫出將相圖
盡洗舊學讀吾書

閒居和雲屋道士

一樽聊共此時心
文字追隨落醉吟
仙子樓臺脩竹外
行人冠蓋畫橋陰
一年芳草東風老
五月空江夜雨深
且作蘭亭歡喜集
更論誰後又誰今

遊青源二首

鍾魚閒日月竹樹老風煙
一徑溪聲滿四山
天影圓無言
都是趣有想
便成緣
夢破啼猿雨
開元六百年
空庭橫蝶竦
斷碣偃龍蛇
活火參禪笱
真泉透佛茶
晚鍾何處雨
春水滿城花
夜影燈前客
江西七祖家

龍霧洲覺海寺次李間溪壁間韻

名昂英侍郎

閣黎鍾後訪團蒲
江色漫漫晝欲晡
一笛梅邊何滿子
千簑蘆外筆頭奴
急風吹鴈還家未
新雨生濤到海無
本是白鷗隨浩蕩
野田漂泊不爲孤

山中

滄州棹影荻花涼
欸乃一聲江水長
賴有蓴風堪斫膾
便無花月亦飛觴
山中世已驚東晉
席上人多賦晚唐
何處魚羹不可飯
蚤拚泉石入膏肓

山中謾成柬劉方齋

名夢桂居南湖太師公玄孫

東風解凍出行嬉
一闕煙塵隔翠微
自有溪山真樂地
從來富貴是危機
二三輩行惟須醉
多少公卿未得歸
明日主人酬一座
小船旋網鱖魚肥

送人往湖南

鴈拖秋月洞庭邊客路淒涼野菊天雲隔酒樽橫北海風
吹詩史落西川夜深鬼火千山雪春後鶉花一樹烟爲我
祝融峰上看朝暎白處禮蓬仙

別謝愛山

君今拂衣去我獨枕書眠一片過林雨數聲當戶蟬情長
空有恨吟苦不成篇後會知何日西風老雁天

病中作

一病四十日西風草木涼倚牀腰見骨覽鏡眼留睚倦策
吟詩杖頻燒讀易香夜深排果餌乞巧大醫王

又賦

病裏心如故閒中事更生睡猫隨我嬾黠鼠向人鳴羽扇
看棋坐黃冠扶杖行燈前翻自喜瘦得此詩清

驟雨知何處一溪秋水生苦吟肩鶴瘦多病耳蟬鳴隱几

惟便睡挑包正倦行山深明月夜乞我半窗清

寄興逃吾病吟詩老此生風高鴻雁起晴久鶉鳩鳴野樹

辭秋落溪雲帶雨行晚涼便懶坐移傍竹陰清

曉起

遠寺鳴金鐸踈窗試寶熏秋聲江一片曙影月三分倦鶴
行黃葉癡猿坐白雲道人無一事抱膝看回文

夜坐

淡烟楓葉路細雨蓼花時宿雁半江畫寒蛩四壁詩少年
成老大吾道付逶遲終有初心在聞雞坐欲馳

題楚觀樓

西風吹感慨曉氣薄登臨半壁楚雲立一川湘雨深乾坤

橫笛影江海倚樓心遺恨飛鴻外南來訪遠音

某叨臬衡湘蒙恩以便郡歸養官齋大卿實寓衡我

十年前邦君也一再見間即分南北五言啓之所

以致今舊雨繾綣云

李官齋名帶

瀟湘一夜雨湖海十年雲相見皆成老重逢便作分啼鵲
春浩蕩回雁曉殷勤江濶人方健月明思對君

幕客載酒舟中卽席序別

故人滿江海遊子下瀟湘夢載月千里意行雲一方櫓聲
人語小岸影客心長總是浮萍迹飛花莫近橋

將母赴贛道西昌

重來鷗閣曉帆影漲新晴倚檻雲來去閉簾花送迎江湖
春汗漫歲月老崢嶸手把忘憂草夔夔繞太清

翠玉樓晚雨

晚樓一曲轉梅花官事無多報放衙林木蔽虧煙斷續江
流曲折雨橫斜年華冉冉風前影歲莫悠悠客裏家一雁
近從沙觜落更饒片雪入天涯

翠玉樓

昏鴉何處落野渡少人行黃葉聲在地青山影入城江湖
行客夢風雨故鄉情試問南來信梅花三兩英

阜蓋樓

一水樓臺繞半空圖畫開蟠涎行薜荔雀影上莓苔碧落
人千載青山酒一杯晚煙看不盡待月却歸來

雲端

半空天矯起層臺傳道劉安車馬來山上自晴山下雨倚

關平立看風雷

和曹倅賦別

名大發
穎倅

翠松三萬頃松雪著神仙柳院催金鑰江花送玉鞭曉巖

雲壁立晚棹浪規圓未了醉翁事重尋穎上田
當年童子見今見二毛翁海月三秋別江雲一日同鷗心
馳舍北龍尾曳天東定有延和奏南來寄一通

改題萬安縣凝祥觀

古道松花空翠香風前鬢影照滄浪飛泉半壁朝雲濕啼
鳥滿山春日長須信神仙元有國不知蠻觸是何鄉道人

橫笛招歸鶴坐到斜暉上壁璫

相如遊獵賦華橫壁璫注
壁璫以玉為核頭

山中再次胡德昭韻

不將顏色污黃金落得灞橋驢上吟是處江山生酒興滿

天風雪得梅心觥籌堂裏春聲沸燈火林昇夜色深入世
可能行樂爾重遊不用下晴陰

人生柳絮關堅牢過眼春光歎伯勞蜀道謾傳千古險虜
山方許一人高眼前見赤徒妨道耳後生風未當豪明月

蘆花隨處有扁舟自在不須篙

曾見尊前此客哉笑攜塵尾拂莓苔水邊飛雁年年見湖
上新亭日日來酌菊醉餘披草坐探梅吟罷帶花回北厓

尚被剛風隔笑殺匆匆上馬杯

周蒼崖入吾山作圖詩贈之

三生石上結因緣袍笏橫斜學米顛漁父幾忘山下路仙
人時訪嶺頭船鳥猿白鶴無根樹淡月疎星一線天為我

醉呼添濛瀼倦來平卧看雲烟

先天集鈔

八五

許月卿字太空婺源人後字宋士人稱山屋先生小名千里駒字駒父從董介軒於程正思朱子門人也又受學魏鶴山有志當世入江淮幕中以軍功補校尉詔罷鵬弁就舉制以易魁江東廷對觸史嵩之見抑賜進士及第授司戶叅軍復率三學訟權相理宗目爲狂士歷官府學教授復以上言小相失職相免得留尋改江西提舉常平六年不就既至治政廉肅人號爲鐵符循承直郎浙西運幹賈似道當國以月卿試館職言不合罷去買田宅于姑蘇已而散之歸故里閉門著書號泉田子游從者翕然德裕乙亥欲以月卿開闢東圖未幾宋亡深居一室但書范粲寢所乘車數字不言幾十年而

卒年七十謝疊山嘗書其門曰要看今日謝枋得便是
當年許月卿月卿則自比履善甫蓋無媿三仁焉

箕山

箕山惟一瓢襄邑亦四壁古今一許氏傳家以清白茶山
與東萊三詩映圭壁後來二三賢題品互紬繹南軒推學
授晦翁要事實亦有小東萊經濟亦何切極意深源流敷
殖久大業臨川有二許我來秋蕭瑟撫卷三歎起寒花香
的皜

京城看月

幾千萬里碧琉璃中有一圓光照之更無一物可與對部
勒星宿光陸離憶昔看月大江頭天地中間風吹衣凡客
無緣相賓主獨攜杯酒獨吟詩祇今千門萬戶閉良夜京

華無人知似我快活更有誰故山今宵月更奇明日懶人
真箇歸

故人

故人歸作山中相老我聊乘雪夜舟細君頗訝不入市山
中訪友將何求扉屨資糧奪之去毀車截鐙挽予留一笑
謂汝賢細君無求我乃肯出游宰相良解軒輕予定難屈
滕低我頭同雲一色天欲雪夜深雲散月明樓

題明皇貴妃上馬圖

開元天寶號太平快活三郎偏縱情帝閑天驥雲雷駛回
首絕憐妃子醉海棠酣春睡未足扶上馬時顏山玉二璫
兩邊扶蹋鬢羣姬爭扶不用命萬花叢玉山花花朝王醉
牡丹其立馬前黃幡綽獻笑容顏似朝譚三郎勒馬頻回

頭兩手按膝雙凝眸夾立兩旁御弓箭帶御器械如行殿
二璫相語儼相向貴妃未至龍顏望龍顏不怡吾曹憂
昵私語雙燕秋御前兩驥立仗後御龍整暇聊緩轡卷中
何止數十人十人眼只在一身朕能墜馬替妃子不忍花
飛驚玉體三郎但念妃子醉豈知身醉誤國事無鹽爲后
能疆齊夙夜警戒雞鳴詩花鈿安得紛委地馬嵬安得有
墜時

涉世

涉世如溪谷只宜在淺處一生如一日未暮早歸去君不
見偉哉男子韓淮陰往往正坐涉世深功成身退豈不好
當時何事歸不早人生少年須立事生我不應負天地了
却君王事便休去時莫待雨頭如今版圖半煙霧眼看

流離無限子取將舊物還君王襁褓赤子寢之牀青天白
日正停午歸去彈琴鶴對舞靜與賢傳不春風吹袂
浴沂天

新安

新安別無奇只有千萬山千山萬山中其奇乃出焉下者
爲硯石與世生雲煙高者無繫累飄然出神仙忽生朱晦
庵追千萬世前示千萬世後如日月當天嗚呼新安生若
人不知再生若人是何年

木犀

詩到黃初上高標不肯唐先師鶴山魏文靖公分封在香
國莖仕得黃裳錦畫纍金印瑤英案玉皇黃香天下士誰
得並清芳

雲邊

雲邊人種麥天際我歸舟月色輕寒夜
笛聲何處樓久晴
人渴雨倦仕我息休高士傳閑看東籬
花正幽

甥館

冬至息吾姪樊川示阿宜驅羊官易取
觀象易難知不遠
復三字大音聲一詩屏山宗邵子晦木
不忘歸
醉鄉真廣大靜夜絕器塵月色明如書
天涯總是春鳥飛
林不夜蝶夢路無人天地中間我孤高
誰與鄰

同滕推游朱緋堂

當日朱緋夢荒烟化鶴城斜陽邊草色
深樹裏禽聲欲雨
路微濕出雲山半青神游應故里只欠
愛翁亭

閒賦

老大天諳練殷勤月往還岩巒有奇操
泉石亦清談隔浦
飛秋葉開窻看夕山天心端正月潭水
夜深參

捧硯姬空翠二首

捧硯姬空翠隨琴鶴曉煙夕陽更山外
流水自樓前芳草
垂楊地和風麗日天戲游看處處明媚
自年年
看山車放慢遇水馬爭先須信一年景
無如三月天露花
如此好煙柳十分圓客醉不須去竹牀
相對眠

飯了

飯了庵中坐高情等寂喧井泉春戶口
篆火午香煙句好
堪呈佛心空不問禪一聲天外雁秋意
滿徽絃

神靜

神靜何須卜心閒卽是仙芋煨牛糞火
瓢滴馬鬃泉綠染

春風柳紅勻曉露蓮明朝晴景好一棹盡平川

次韻李制幹贈行

科舉有衣鉢臨行問細君梅花入征夢楊葉礪功勳儼對
丹墀日捷排闥闔雲政須及邊事毋惜齒牙論

次韻雲岩

權輿於我屋渠渠久敬如君世莫如明月清風詩滿案好
天良夜酒連車樽前遠韻輕盈菊醉後分題爛熳書凡此
坐中人十九鉤樞玉帶客金魚

次韻程愿

二李歌行醉裏歌君溪雨棹我煙簑鳳凰臺上我山墅虹
馬軒高君月坡曉徑酸間追李杜夜窻灰裏撥陰何長哦
歲晚成二老詩社往來君肯麼

入邑問炊中雲招王希聖起龍

希聖平生詩酒豪居然閉戶學孤高不知昨夜秋風柳得
似當時春日桃別去半年猶且暮胸中百痒欠爬搔虎溪
破戒君須解已辦清詩與濁醪

追賦暮遊

余庚子冬絮絮離廣陵將肄奉常試業于京師舟泊無
錫日已暮與王希聖微服遊南禪蓋訪古也參寥題名
壁無恙寺記有碑碑陰結字甚偉視之蔡京也出門煙
樹蒼然數僧偶語而已余與希聖却立四顧曰此佳景
也當寫之爲詩而舉子業亂其中不能就暇日追想宛
在其目爲詩以寄希聖其明年冬十一月也歲月驅人
又可一慨

錫山舟泊似荒村微服南禪古跡存壁上姓名今已遠碑
陰人物了能言薄游草草山侵岫遠思悠悠風滿軒攜手
出門煙樹密數僧離立語黃昏

寄題岩經樓

樓中圖史澹燼巢中有成都較藝文手澤存焉生舊感心
傳妙處長新聞世科事業無如子經學源流可教君祇恐
校讐天祿閣猿啼樓外滿溪雲

滿城風雨近重陽

滿城風雨近重陽一舸煙波入醉鄉心事已同鷗鳥白
界空有雲山蒼酒安能管興亡事菊亦頗復時世粧何似
長歌明月裏月明天濶地更長

挽座主吳倅

菊翁去後菊園荒壽不如花儘自香進學解成誰具錦題
輿字濕已黃梁泉流出壑三秋暮明月照松千仞岡冷落
僧爐數間屋但留名節付賢郎

挽李左藏

少年謂子氣橫秋壯已邊城汗漫遊筮仕弗如歸亦好讀
書未了死方休半生懶意琴三疊千古詩情土一丘月落
錫林煙露冷松風無賴自颼颼

次韻朱塘

淳祐二年春王正月丁巳許月卿過滕滕子曰子嘗遊
朱塘乎曰未也曰淳熙之三年朱文公歸故鄉游朱塘
山深水靜荷華其間慨然曰是吾夢游所也此誰之士
於是先大夫拱而進曰先業也先塚在此文公曰是宜

爲亭以領山水子取幅紙吾爲若書以告同志者共成
之先大夫雅謹畏時又少四顧無楮筆則已異時爲鉛
鈞言以爲恨常試與子遊乎遂如朱塘歸相與爲詩秋
八月亭成郡丞秘書郎書其扁曰晦庵亭滕子以詩來
有晉之者冬十月詩成月卿用韻亦賦之

游子從來悲故鄉歸來襟袖芷蘭芳夢魂飛去雲濤遠杖
策閑行秋水光可是夢中曾到此安知身後却餘香紫陽
弟子有賢子卜築新亭真宥堂

辨賈徽州

東書歸去饗梅花底事霏英故故斜約住忙中千里鶴羨
渠如意兩歸鴉家中見雪念爲客客裏觀梅不似家園樹
暫時相鬪白明朝休向我儂誇

三月

三月春如年少時了知造化最見嬉智行無事柳飛絮道
發自然花滿枝錦繡園林添富貴神仙院落清奇老夫
長似春三月遊戲人間不皺眉

春日閒賦

數行竹樹鳴春雨一簇人家帶曉煙省事山丹自籬落親
人海燕並庭簷樓高思遠天無極酒罷歌闌月正圓新茗
一甌香一篆與君清坐看風簾

中秋謝施婺源爰

高情古意滿溪樓靜拍欄干儘兩眸月不露圭天有道風
能谷水無愁從吾所好萬青籬捨我其誰雙白鷗別樣
主人情重處不將紅妓澆中秋

浴罷

浴罷被襟竹影斜客中殘暑散空花人行意外雲無脚月
起林間燈映紗舉酒聞鐘知近寺談詩食李却忘家明朝
又浴還來此何必開樽只煮茶

仲春初五日報謁

玉磬蒲團出定音謁酬與世費浮沉徑松叅漢周官蕭塢
竹藏雲商易深暮色溪山皆有道春風花草本無心年來
年去頭成白斗酒樓前明月斟

多謝

多謝東皇着意晴海棠勻趨笑相迎園林富貴何千萬花
柳功勳已十成曉雨有情於芍藥春風無處不流鶯扁舟
水長一篙許茶竈筆牀聊意行

厭厭

厭厭夜飲忘更深客不來辭主有情僮僕觸屏處蝶夢姬
姜壓笛作蟬聲月如有待行行慢風不生嗔細細清萍散
人生何可料嬋娟千里共交盟

項似道眉子硯

集賢得予同年湯東澗所贊眉子石輒贈梧岡命許某
賦之得一首

新安硯石舊多奇硯入黃扉得所歸呵水浮雲尤物視傳
衣半夜偉人知坡仙爲欠十眉詠李及何妨一硯持堪笑
泉石老居士無端渾沌盡新眉

次周尚書

詩律無寒鄴州家風洗耳侯傳以酒爲真印萬

法惟梅不共流幸免五經嘲笥腹可無百尺進竿頭從來
此道飄零甚戎索惟憑疆以周
平原平等視青州不佛不仙仍不侯滿樹絲蘿天富貴半
憲水黑月風流皆云臨濟具雙眼且放東坡出一頭劈畫
尚能千百歲須更一笑跨商周

暮春聯句

清廟朱絃瑟羔羊素絨風釣竿漁艇小園徑李蹊通白酒
渾忘送皇天似不公風簷開秀色雪緒現酥胷王化殊無
外聖賢時復中人稱君子子卿自密翁翁從喚酒經癖聊
紆花史忠前知安用卜定見不訪江橘樸使令熟竹君家
計豐六年無不可三語將無同柳子鑽只為士大夫道个乞字價巧韓公不送窮

沃心禪帝學古道暢皇風天下真無敵君前置一通將拈
龍尾硯去作魚頭公筆底瀾翻舌談閒磊瑰胸通明雲殿
上清切玉堂中發軔同安簿深衣獨樂翁孝經題幼志沼
鑑見精忠元祐龍蛇雜開禧蠹賊訂隆冬老儒立奸黨一
碑豐三晉春秋在千年綱目同長天照孤憤清夜好研窮
徐字不晉帖楚詩無國風山谷謂東坡不成邦公如大國楚吞五湖三
江十五國風無楚詩蓋外之也天邊長劒倚花外小車通不肖吏文叔誰
能書子公二三豪俊骨數萬甲兵宵柵暗琴三疊梅殘酒
一中羨君屠龍技笑我祝雞翁擊甕浮見智編橋度蟻忠
行春奉寬詔佩犢弭兵訂天濶吟邊遠月明詩檐豐秋光
宦情薄鸞鶴瀟聲同清澗耳堪洗深山日更窮

千年

千年光景東西漢一把春風大小喬坐
嘯行吟芳草碧杜鵑時節雨瀟瀟

人間

人間瀟灑柳塘仙三遺詩來各四篇安
得左螯右杯酒與君爛醉柳塘邊

途問伍

乍雨乍晴寒食候半花半蕊山磬香老
農甚喜天意好日暖今年不凍秧

車中

路平正好坐車中時有禽聲山翠濃馮
鞞斜睨看法帖開簾正面受春風

白雪

白雪家家拆蠶箔清風行行入秧苗半
開猶蕊花情遠久雨初晴禽語驕

槐影

槐影本來惟戴日蟬聲固自未知秋斜
陽薄雨羊歸徑冷月橫星人倚樓

吟蛩

吟蛩不管興亡事舞蝶那分夢覺身別
浦連牆歸遠客高山小徑過樵人

朗湖道中因見二事信筆二首

屋下種花簷露滿窗前疊石岫雲生春
風不解分疆界本自無心却有情

鳥雀逢鷓皆憶鳳鷓鷃遇獺等求魚秋
風雪散天無極清

曉冥冥鴻影孤

新安道中

白水黃山天一青
雪梨金柳雙眼明
要知來日清明日
請聽鶻鳴第一聲

無山

無山平野雲天濶
有月高樓烟水微
渴睡車中鶻一疇
愁吟路上蝶雙飛

題劉後村所跋楊朴移居圖

曾對君王已放還
何須當道把漁竿
使軺將宿人將避
拗折漁竿趕入山

白石樵唱鈔

林景熙字德陽號霽山溫之平陽人也咸淳辛未太學
釋褐授泉州教官歷禮部架閣轉從政郎宋亡不仕客
於會稽王修竹英孫之家會楊璉真伽發宋陵英孫使
客收其棄骨景熙得高孝兩函與唐珏所收者墓于蘭
亭樹冬青以識庚戌卒于家年六十九所居在白石巷
詩六卷曰白石樵唱大槩悽愴故舊之作與謝翱相表
裏翱詩奇崛熙詩幽宛蛟峰方逢辰曰詩家門戶當放
一頭非虛言也

商婦吟

良人滄海上孤帆
渺何之十年音信隔
安否不得知長憶
相送處缺月隨我歸
月缺有圓夜人去無
回期回期倘終

有白首寧怨遲寒蒼苦相弔青燈鑒孤幃妾身不出幃妾
夢萬里馳

鄭宗仁會宿山中

宗仁樸翁也號初心平陽人
大學釋褐出身仕至國子正

挑燈懷舊夢移席近春泉共話忽深夜相看非少年斗垂
天末樹燐出雨餘田亦有茅簷下飯牛人未眠

獨夜

客鬢雙蓬老拾遺一燈明滅酒醒時百年回首忽成夢萬
竅有聲皆是詩殘夜月枝烏未穩故鄉水草鴈多饑袂衣
初試新霜冷欲折黃花寄所思

答周以農

平陽縣源人號稼村

一燈細語煮茶香雲影霏霏滿石林萬里夢魂形獨在十
年詩力鬢俱蒼山空絡緯悲秋雨水落蒹葭足夜霜未會

漆園觀物意酒闌猶發次公狂

題陸大參秀夫廣陵牡丹詩卷後

南海英魂叫不醒舊題重展墨香凝當時京洛花無主猶
有春風寄廣陵

歸自越避寇海濱寒食不得祭掃

持酒無因灑墓松禽聲花色慘東風去年此日身為客及
到鄉山又客中

道中

程入江鄉宿新炊飯帶沙亂山愁外笛孤驛夢中家野水
平菰葉春風足棟花西來三兩客閑說舊京華

歸白石故廬

四鄰井竈出荒墟獨鶴歸來認舊廬一逕蒼苔供瘦策半

簪華髮伴殘書斜陽巷陌語初燕新水池塘生細魚小立
春風隣寂寞忽吹花片入襟裾

春暮

乾坤萬事上眉端寂歷東風獨倚欄白髮餘春能幾醉綠
陰細雨不多寒香飄苔逕花誰惜影落沙泉鶴自看碧眼
野僧知我意素琴攜就竹西彈

酬潘景玉

平陽人

喚起離愁落木聲抱饑猶自向書耕江湖有夢追前事天
地無根笑此生歲晏斷鴻羈客影夜深殘火故人情幸來
相就分岑寂閑對梅花酌翠觥

用韻寄陳振先同舍

心事淒涼寄鴈聲石田言滿未妨耕西風戍角催年換殘

夜江樓見日生煮茗敲冰貧有味看花隔霧老無情湖山
猶憶笙歌底笑領春香綠滿觥

春感

柳花袞雪春冥冥溪風一夜吹爲萍萍隨風去渺流水人
生無根亦如此故山入夢草芊芊半窗疎雨寒食天曉來
白髮稀可數多少朱顏化黃土高原冉冉青煙斜麥飯灑
松能幾家子規叫殘金粟暮蘭蕙蘭亭已飛去

宿台州城外

荒驛丹丘路秋高酒易醒霜增孤月白江截亂峰青旅鴈
如曾識哀猿不可聽到家追此夕三十五邨亭

贈天目吳君實

天目山在臨安縣西五十里

詩興翩翩度雪溪巖雲猶護舊留題夢回殘月蒼梧曉家

在春風秀麥西萱草堂淡衣屢寄桃花觀冷酒重攜故山
石鏡無人問空與寒猿照影啼

新春

衰顏憑酒潤故國得春新兵革兒童長風霜天地仁草心
懸落日柳眼看行人擾擾紅塵者知誰效角巾

鄭氏西莊

不踏紅塵道結廬依水鄉遠峰開宿雨高樹表初陽犢卧
野門寂鴈飛秋稻香午橋花竹地回首已淒涼
酬潘景玉
讀史雙眸夜炯然一聲江鴈落燈前馬非汗血材終下木
或青黃性不全風月未容詩入務乾坤應許酒爲年寒城
日出無窮事老耳山中獨聽泉

答柴主簿二首

名本號別齋瑞安人

相隔雲江有夢尋篇詩寄舊重兼金山林未遂鹿麋性風
雨空愁葵藿心老氣十年看劔在秋聲一夜入燈淡銅槃
消息無人問寂寞西樓待雁音

閒采秋荷自製衣相逢舊雨語依依學窮科斗心空老夢
跨蟾蜍肉不飛幾喚江帆和雁渡長歌巖戶見雲歸何須
化鶴千年後城郭人民半已非

寄周計院

瑞安人

海桑變紛紛秀色見孤嶼山林華髮尊黨遂淡衣古獨餘
釣天夢儻然在巖戶翳翳桂魄沉沉槐夢雨江濤豈不
深修鱗挂網罟不知義井船秋風繫何許

溪行

日正惟尋少

四

風高餘暑盡獨策與悠然野色延幽步秋聲入暮年日斜
禽影亂水落樹根懸回首故人遠城笳吹夕烟

仙壇寺西林

古壇仙鶴杳野鹿自成羣松氣浮清曉經聲出白雲石穿
僧屋過水到寺門分人世無窮事山中了不聞

寄鄭宗仁

城南懷舊別谷口寄春耕野鶴巢雲老林僧管瀑清養花
疏石髓煉藥伏山精見說孤燈雨年來著易成

哭郭同舍

宜孫

寂寞青燈舊流離白髮新病猶依故國死乃見全人殘墨
家無子高風墓有鄰斯文堪一哭落日冷湖濱

答鄭卽翁

初陽蒙霧出林遲貧病雖兼氣不衰老愛歸田追靖節狂
思入海訪安期春風門巷楊花後舊國山河杜宇時一種
閑愁無着處酒醒重讀寄來詩

東山渡次胡汲古韻

汲古名喬號天放嚴州人

客來持酒灑煙霏空想高風意欲飛老洞藏雲安石卧孤
舟載雪子猷歸一川白鳥自來去千古青山無是非欲上
危亭愁遠眺廢陵殘樹隔斜暉

贈秦霞真士祈雨之驗

冲真平陽人姓吳氏

火旂焰焰燒坤垠蒺藜滿道風揚塵稿苗無花不作穀老
農扶杖田頭哭哭聲不爲填溝渠室罄何以供官輸檄龍
唄佛寂不應蜥蜴那能擅灌柄秦霞真士鞭風霆綠章叩
天天亦驚玄雲沛雨起膚寸點點都是盤中飯須臾收斂

歸無聲翩然駕虬出山城我聞調元功自古亢爲常賜伏
常雨廟堂有道司牧良坐看玉燭開金穰淮南捕蝗蝗更
在饑蛟齧人陸成海肥羊日日供大官論功乃使專黃冠
真士寸田無水旱天機子夜交離坎

哭德和伯氏六首

季德淵先六月逝

棣隕雙葩淚灑紅百年已短更匆匆祇今風雪栖栖影地
老天荒一箇鴻

風塵何處託清魂家世梅花水月村舊篋已無封禪藁獨
憐渴病似文園

空遺破硯孤心苦只博生綃兩鬢華小婢燈前泣秋雨竹
房不見夜呼茶

溪冷浣花宗武哭池荒夢草惠連愁行人猶說春風夜燈

影書聲共水樓

伯兮癯似松間鶴季也孤於雲水僧昨夜夢中聞笑語覺
來秋在影堂燈

草枯霜白泣原鶴五十三年老弟兄風雨對淋緣未了荆
花重合在來生

山窗新糊有故朝封事藁閱之有感

偶伴孤雲宿嶺東四山欲雪地爐紅何入一紙防秋疏却
與山窗障北風

僧門

一閒每笑不如僧及到僧門閒未能昨夜褐袍風雪裏隔
溪犬吠入林燈

雜詠酬汪鎮卿

名壽號桐陽平陽人

百感湊孤夜江樓起呼月秋蟲聲轉悲念此衆芳歇人生
非金石青鬢忽已雪別淮榻心移出山泉性汨倚蘭抱孤
芳不受宿莽沒

淪惡易如墜進善難如登危哉方寸地風雨吹冥冥尺水
增丈波鯁鱗亦爲鯨海桑空變易天地終清寧感此坐中
夕疎林動秋聲

垂垂大厦顛一木支無力精衛悲滄溟銅駝化荆棘英風
傲几礎濱死猶鐵脊血染沙場秋寒日亦爲碧惟留吟嘯
編千載光奕奕

權臣坐偃月棄官如飄蓬及茲顛沛秋翻然挺孤忠一死
未得所網羅挂秋鴻渡淮已不食蛻稿夷齊風何人續遷
史表爲節義雄

趙輿別業

在平陽城西二里馬鞍山下

已無湖海夢漸老足閒情野杖日尋壑家書時到城開池
納天影種竹引秋聲亦愛簞瓢樂年來世味輕

新昌道上

江湖猶是客歲月已成翁仙路重雲外人家落木中山痕
經燒黑土脉人泉紅又得春風信孤花照驛東

錢盛景則教授

台州黃岩人職教平陽

空明仙人朝帝所跨鶴凌虛墮霜羽洞中石髓流不乾聖
泉瀉入君肺腑潘江陸海一目盡自提修綆汲千古碧芹
水冷涵夜燈丹鳳山空鳴曉鼓有時白戰風騷場小巫見
之縮雙股飯雖不足仁義腴墻陰老薺羹春苦丈夫出處
各有道天地綱常要撐拄俗吏惟知騁刀筆腐儒亦或拘

白石相唱金
訓話雲霧窓寒森寶書廣文袖有修月斧離亭酒短秋帆
開雁蕩峰前桂花雨

元日卽事

宿霧沉城海日遲十年冉冉鏡中絲江湖舊夢衣冠在天
地春風鼓角知杜曲桑麻歸已晚尚平婚嫁畢何時野人
問我行藏事自向庭前采栢枝

燈市感舊

舊夢仙山駕海龍飛梅如剪柳如灑千門疑是繁星落九
陌不知明月高零亂遺鈿空宿草昇平疊鼓散春濤寒燈
寥落殘書在獨抱荒愁寄濁醪

栢城

處州古爲栢州

寒芒曾動少微星一水溶溶疊嶂橫落日漁舟吹遠笛斷

烟戍屋帶荒城沙鷗欲近如招隱關樹無多亦厭兵却憶
鶯花亭下路太平簫鼓沸春聲

荅唐玉潛

越州人東墅註名珥卽與霽山同收宋陵
骨各葬義士也

畎畝孤心老未衰一籬瘦菊一瓢詩黃埃赤日謾多事蒼
狗白雲能幾時山酒栢香春壽母案書芸冷夜呼兒橫琴
妙在無弦處何必知音有子期

陪王監簿宴廣寒遊次韻

亭四畔首植木屏名廣寒

銀橋疑駕海天長丹粟離離照翠觴影浸山河瓊殿冷舞
深風露羽衣香亦知廣莫元無野却笑溫柔別有鄉手折
一枝驚昨夢素娥憐老授玄霜

酬謝臯父見寄

南劍人名

入山采芝薇豺虎據我丘入海尋蓬萊鯨鯢掀我舟山海

兩有礙獨立凝遠愁美人渺天西瑤音寄青羽自言招客
星寒川釣烟雨風雅一手提學子屢滿戶行行古臺上仰
天哭所思餘衰散林木此意誰能知夜夢繞勾越落日冬
青枝

重過虎林

虎林山在錢唐舊治北半里亦曰武林今為郡稱

漠漠江湖夢蕭蕭禾黍秋清笳吹落日白髮過西州池涸
神龍逝山空老鳳愁惟餘關外水寂寞自東流

西湖

繁華已如夢登覽忽成塵風物曠西子笙歌醉北人斷猿
三竺曉殘柳六橋春太一今誰問斜陽白水濱

孤山

林逋隱處

回首咸平夢清風自滿湖乾坤一士隱身世此山孤鶴去

空秋影梅開尚舊株耳孫今白髮持酒醉寒蕪

葛嶺

度宗賜賈似道第于西湖葛嶺

不讀霍光傳炫然桃李門湖山變朝市烽火滿乾坤膽落
水天騎魂飛瘴雨村春風吹秀麥誤國竟何言

寄別諸公

盍簪譚舊夢持酒送餘春天地綠陰雨江湖白髮人時平
銷劍氣客久積衣塵又出重關北斜陽獨問津

會嚴陵邵德芳同舍邀宿玄同齋道舊有作

市槐夢忽醒喬柯落風雨何人斧為劫遺根尚依土緬懷
赤燁初鬱若翠蛟舞其下有橋門甃雍冠帶聚萬物遞衰
盛千載一仰俯射策君先登氣勇不再鼓遭廻三舍間我
亦躋寸武雲雷膏尚屯有志良獨苦空山少芝薇大澤多

網罟爾來涉長途征衣拂天姥遙泛松江舟薰風采芳杜
故人隱雲間九山青照戶相逢各華顛舊事不敢吐恁哉
抱玄同高卧標枝古

雲間懷古

薰風短棹水粼粼老鶴疎林寂不聞內史祠荒殘碣雨黃
門書冷半堆雲獵場斜日分棄塲馳道淩秋走鹿羣寥落
一觴誰弔古漁鄉煙景客平分

蘇小小墓

錢塘名倡有墓在嘉興縣西南六十步

歌扇風流憶舊家一丘落月幾啼鴉芳魂不宥爲黃土猶
幻燕支半樹花

京口月夕書懷

鎮江路也

山風吹酒醒秋入夜燈涼萬事已華髮百年多異鄉遠城

江氣白高樹月痕蒼忽憶凭樓處淮天鴈叫霜

新豐道中

丹陽地名

長飈卷炎埃澄空出秋素迢迢鐵甕城回首隔蒼霧酒帘
颺荒市笳鼓發淩戍倚篷問舟人云是新豐路雞落鷄欲
棲野水牛半渡不見抱琴人斜陽在高樹

石翁媪

在丹陽

東艾楚俗愚鑄金秦民飾何年斲雲衣偶立此翁媪千春
衣莓苔借老食風露世人輕結髮覆亦或且暮乃習無情
緣永與天壤固停舟一訪古久欲祛此銅父老向我言曾
是梁朝墓衣冠化黃土古丘亦成路當年殉金棺茲物獨
如故閱世如過客興亡了不悟時借牛礪角敲火戲童豎

舟中書事

白石詩集
村酒沽來濁可斟扁舟過雨繫楓林午香吹稻海田熟秋
蔓引菰茅屋濺天地暗塵歸客鬢江湖斜日動鄉心衰年
自笑爲形役空羨閒鷗卧水陰

練川道中次胡汲古韻

客中還又客回首憶并州一枕江湖夢五更風雨舟水寒
荷葉老蟲響豆花秋幾度看雲坐吾生亦覺浮

過吳門感前游

回首前游夢未忘江雲漠漠樹蒼蒼客心空老鶯花月詩
貌不肥魚稻鄉白虎氣銷遺瘦石綵虹影冷卧斜陽當時
已嘆來麋鹿後二千年更斷腸

宿七里灘

寥落空江上買魚開酒尊亂山含雪意孤艇寄楓根灘近

不成夢鴻飛欲斷魂偶呼黃帽語一犬吠前村

宴德初書樓

姓陳氏平陽人

樓高不二尋已作百尺想中有湖海豪開襟納萬象頗延
素心人談笑落清響鄰花吹午香簷竹薦秋爽於中了行
藏此外斷俯仰西樓富薰天歌鐘樂華敞荒涼風雨餘山
夔自來往

鹿城晚眺

郭璞卜東嘉城基有白鹿銜花而出故名
爲鹿城

古城仙鹿遠百感赴斜曛海氣千年聚山形九斗分神鴉
飢啄蘚宰木蠹藏雲何處鳴鈺發春屯又易軍

初夏

春歸不知處溪棟日初長舊篔簹題詩扇疎簾讀易香田蛙
占水旱海燕語興亡復恐閑愁起聽泉過石梁

過陶嶺有錢王井又三里有錢王石菴在越州即陶山嶺也
沙井泉初試石菴苔已荒不知更宋代猶自說錢王古塚
木根怪春山雲氣香詩成無紙筆駐馬語殘陽

訪武伯山居

在舜田下

照書雙眼碧天欲壽斯文白髮前朝士青山半屋雲遲花
春後見遠瀑夜深聞迴首重華夢荒田自鹿麕

客意

獨夜愁如此殊鄉老奈何故人經亂少歸夢入秋多衣敝
鄰礎動書沈海鴈過燈前空拂劔酒薄不成歌

潘山長入括

潘平陽白石人

為官轉多事行役到寒糴落日隣州樹西風逆水船飯牛
懷白石訪鶴入青田我欲看行卷仙峰雪瀑邊

元日得家書喜

爆竹聲殘事事新獨憐臨鏡尚儒巾寒窗琴冊燈花曉衰
髯江湖栢酒春道在老天扶客健書來稚子識家貧舊山
亦有閒風月歸與漁樵作主人

次翁秀峰

温州在城人

花柳湖西別此翁十年鬢雪忽重逢唐陵愁問永和帖楚
水夢聞長樂鐘黃妳秋燈餘舊癖素侯野服拜新封世情
雲雨何時了千古青青太玉峰

寄七山人

平陽州治北五里有七星山齊初心先生隱居于此稱為七山人

十年疎髯為誰斑天借儒冠日月閒欹枕寒生雙瀑澗開
門春滿七星山鶴歸尚覺遼城是鶴老空聞蜀道難欲覓
九還憑寄語青牛何日度函關

和王德游夜感

監簿子

小池荷淨雨初晴世念消磨未到僧衣帶長江空北固觚
稜舊月隔西興一春空負花前酒獨夜相知竹下燈自笑
老來甘鷓退少年雲路健追鵬

洞霄宮

洞天有別雲爾地無凡土嘉名此兼擅靈氣適專聚峰巒
互重掩雲霧自吞吐飄然乘冷風一瓣謁瓊宇住山老舊
冠迎客琪樹午魚魚美少年華裾集齋鼓往者修鍊人飛
昇接高武爾來何寂寥山川亦今古甲第疑王侯億萬富
倉庾所以氣體移學道不精苦吾聞郭許儔卓菴老林莽
終日對白雲餐松飲石乳

大滌洞天

九鎖絕人寰一嶂聳天柱自從開闢來着此洞天古奇石
千萬姿元不費神斧帝勅守六丁山夔孰敢侮白晝中冥
冥游者必持炬或絢若霞敷或蹙若波詭或豎若旌幢或
懸若鐘鼓或虎而爪踞或鳳而翅舞異狀紛獻酬清音起
擊拊不知金堂仙恍惚在何許褰衣下側逕層嵐結瓊乳
逕極躡轉深幽潭蓄風雨劣容童豎入恐觸蛟龍怒凜乎
不可留長嘯出巖戶

天柱峰

誰作孤峰紫翠巔疏泉一脉到宮前却憐千尺擎天柱不
挂東南半壁天

神仙隱跡

仙子渾無涉世勞屐痕一尺寄孤高幾人失脚風波裏可

是雲根立得牢

陳子植草廬成求予賦

老矣杜陵客草堂倚江干故人相幽築皇天愍生還君家
付楚炬結構當時薺謂得風雅力竹木供大官城邊歸野
鶴杳杳發長歎朱薨昔峩峩碧草今曼曼何如蔭白茅容
膝有餘安我哀喪亂餘人煙半凋殘風淒狐兔警露重星
斗寒丈夫坐一室此念馳九寰所以草堂人安得千萬間
寄四明陳林陽四明在明州山有四門通日月星辰
高人謝世紛誅茅在絕壁十年不下山舊路掩深棘出門
復踟躕觸步有崩石下臨千仞淵毒鱗正紛籍腥風鼓洪
濤石齒鳴咋咋失勢倘一落萬縷那可及不如息我軀援
鶴與朝夕

山中早行

短策穿幽徑山樵半掩扉月斜林影薄石盡水聲微一犬
隔籬吠孤僧何處歸相逢松下立風露滿秋衣

答山中侃上人

竹房分半席流水白雲間丹竈餘千載青鞵第幾山有詩
多解悟無髮得高閒因笑塵中客重蓬改舊顏

初夏病起

青衫蕉鹿夢江海一畸人舊國愁生暮衰年病過春天垂
湖色湛雨洗月痕新猶抱遺經在心銜覆載仁

答陳景賢

一劍挂寒壁艱危氣不衰鬢痕朝鏡覺書味夜燈知夢斷
潮生枕愁新鴈入詩思君心欲折又負菊花期

薛得之之江東簡熊西玉諸公

乍逢還又別龍竹葛陂陰野水流春遠江雲入暮淡新知
滿湖海遺老在山林解后如相問憑君道素心

酬合沙徐君寅

合沙福州郡稱

歸鶴悠悠渡海遲閑來野寺看僧碁鄉心荔子薰風國客
路槐花細雨時天地一身愁自語江湖諸老澹相知烏絲
醉後淋漓墨片月涓涓照硯池

重游鏡曲次韻

青眼重逢白髮新舊游却恐是前身野鳩如客招呼雨江
燕隨人管領春曾附仙舟追李郭獨提詩律繼黃陳鏡中
恨不移家住山水蒼蒼老釣綸

立秋日作

苦熱如焚想雪山清商一夕破愁顏炎光斷雨殘虹外涼
意平蕪遠樹間忙踏槐花猶入夢老催蒲扇共投閑城頭
遙望纍纍塚遶海荒寒鶴未還

浙中饑甚六月一雨頗慰

雨餘燈火坐茅齋此夕田家有好懷造物心終扶畎畝蒼
生命已墮顛崖燕山漕粟初航海浙水移家半入淮貞觀
三錢誰復識擁衣數起望台階

王監簿南墅新樓樂成

王英係號脩竹會稽人仕至
將作監簿素與先生友善革
命後先生游越多居其家

玉佩珊珊不可招眼空塵界等秋毫山林貞白三層迥湖
海元龍百尺高自笑行藏關氣數肯將歌舞換風騷卷簾
最愛南山近坐聽松聲起碧濤

白不...
餞盛景則教授

台州黃岩人職教平陽

空明仙人朝帝所跨鶴凌虛墮霜羽洞中石髓流不乾聖
泉寫入君肺腑潘江陸海一目盡自提修綆汲千古碧芹
水冷涵夜燈丹鳳山空鳴曉鼓有時白戰風騷場小巫見
之縮雙股飯雖不足仁義腴墻陰老薺羨春苦丈夫出處
各有道天地綱常要撐拄俗吏惟知騁刀筆腐儒亦或拘
訓詁雲霧窓寒森寶書廣文袖有修月斧雜亭酒短秋帆
開鴈蕩峰前桂花雨

訪僧鄰菴次韻

拂石題詩滿袖嵐尋僧又過竹溪南乾坤浩蕩酒鄉寄山
水蒼寒琴意參老燕未歸同是客孤雲無住孰爲菴寂寥
午夜松風響疑是神仙接塵談

述懷次柴主簿

獨閉柴門木石親詩筒剝啄不妨頻青燈風雨多離夢白
髮江湖少故人謾讀楚騷招太乙誰聽郢曲和陽春書香
劒氣俱寥落虛老乾坤父母身

次曹近山見寄

告春字問農平陽海溪人登咸淳第
後以詩文著名

扣角歌殘夜正長懶將龜策卜行藏風煙萬里別離夢草
木一溪文字香仙泣銅盤辭渭水鶴歸華表認遼陽愁來
偶上西樓立耿耿寒奎色照霜

新晴偶出

琴牀茶鼎澹相依偶爲尋僧出竹扉風動松枝山鵲語雪
消菜甲野蟲飛看花春入枕榔杖聽瀑寒生薜荔衣古寺
無人雲漠漠溪行喚得小船歸

雲門山在會稽南三十一里今名雞巖

雲門卽事

最愛林中過客稀坐分片石澹忘歸僧閑時與雲來往鶴
老不知城是非蕭灑山光秋入畫清寒花氣曉侵衣一溪
截斷紅塵影西有任公舊釣磯

寄林編修

名千之字能一平陽人

大雅凋零尚此翁醉鄉一笑寄無功衣冠洛社浮雲散弓
劍橋山落照空東魯有書藏古壁西湖無樹挽春風中車
莫過青華北城角吹愁送暮鴻

題海上人樓

水村煙景隔晴霏十二闌干在翠微一壑暮年閒獨倚半
簷秋影澹相依栢爐貝葉香猶潤紙帳梅花夢不飛會得
此中無所住來來去去總玄機

催梅

參橫月落幾相思第一春風向此期乘興竹筇霜後路寄
聲籬落水邊枝禁中鼓絕花奴老海上宮深鳥使遲獨抱
素心誰是伴羅浮仙夢隔天涯

題陸放翁詩卷後

天寶詩人詩有史杜鵑再拜淚如水龜堂一老旗鼓雄勁
氣往往摩其壘輕裘駿馬成都花水甌雪碗建溪茶承平
麾節半海寓歸來鏡曲盟鷗沙詩墨淋漓不負酒但恨未
飲月氏首牀頭孤劍空有聲坐看中原落人手青山一髮
愁濛濛干戈滿天南東來孫却見九州同家祭如何告
乃翁

夢回

夢回荒館月籠秋何處砧聲喚客愁
淡夜無風蓮葉響水寒更有未眠鷗

聞蟬

近交纔薄雲翻手舊夢冠空雪滿顛
却憶畫船曾聽處夕陽高柳斷橋邊

與邵德芳三首

聚散雲萍亦偶然十年曾此繫秋船
當時別意芙蓉老不道相逢又十年
年少同游古辟雍文光萬丈掃秋虹
不須舊事談如夢燈下相看亦夢中
葵心戀日還終在橘性踰淮已不同
誰識鱸江持釣手曾奉月窟一枝紅

別王監簿

玄髮相逢雪滿顛一番欲別一凄然
離亭落日馬嘶渡舊國西風人喚船
湖海已空彈缺夢山林猶有著書年
蓬萊不隔青禽信還折南枝寄老仙

夢中作四首

元兵破宋河西僧楊勝吉祥行軍有功因得於杭置江淮諸路釋教都總統所
以管轄諸路僧人時號楊總統盡發越上宋諸帝
山陵取其骨渡浙江築塔于宋內朝舊址其餘骸
骨棄草莽中人莫敢收適先生與同舍生鄭樸翁
等數人在越上痛憤乃不能已遂相率為采藥者
至陵上以草囊拾而收之又聞理宗顧骨為北軍
投湖水中因以錢購漁者求之幸一網而得乃盛
二函託言佛經葬于越山且種冬青樹識之會元
時作詩不敢明言其事但以夢中作為題下篇冬
青花亦此意也

珠亡忽震蛟龍睡軒敞寧忘犬馬情
親拾寒瓊出幽草四山風雨鬼神驚

一坏自築珠丘土雙匣猶傳竺國經獨有春風知此意年
年杜宇泣冬青
昭陵玉匣走天涯金粟堆前幾莫鴉水到蘭亭轉嗚咽不
知真帖落誰家
珠息玉鴈又成埃斑竹臨江首重回猶憶年時寒食祭天
家一騎捧香來

冬青花

冬青一名女貞木一名萬年枝漢宮嘗植後世因之宋諸陵亦多植此木

冬青花花時一日腸九折隔江風雨晴影空五月溪山護
微雪石根雲氣龍所藏尋常螻蟻不敢穴移來此種非人
間曾識萬年觴底月蜀魂飛遶百鳥臣夜半一聲山竹裂

山民詩鈔

八七

真山民不傳名字亦不知何許人也但自呼山民云李
生喬歎以爲不愧迺祖文忠西山以是知其姓真矣痛
值亂亡淡自湮沒世無得而稱焉惟所至好題詠因流
傳人間然皆探幽賞勝之作未嘗有江湖酬應語也不
惟吳許上通於天卽自命遺民而以詩文通當世者視
山民才節亦足愧恥矣張伯子謂宋末一陶元亮非過
論也

幽居雜興

松桂小菟裘山扉幽更幽蜂王衙早晚燕子社春秋鬢禿
難遮老心寬不貯愁年來把鋤手無復揖公侯

新春

石山民詩集
餘凍雪初乾初晴日驟暄人心新歲月春意舊乾坤煙碧
柳出色燒青草返魂東風無厚薄隨例到衡門

光霽閣晚望

一閣納萬象危闌俯泚泚白沙難認月黃葉易爲霜宿鳥
投煙嶼歸樵趁野航孤吟誰是伴漁笛起滄浪

興福寺

爲厭市喧雜攜詩來此吟鳥聲山路靜花影寺門深樓閣
莊嚴界池塘清淨心松風亦好事送客出前林

夏晚江行

行盡山頭路江空帶夕暉風蟬聲不定水鳥影同飛蕭散
烏藤杖輕髮白苧衣試呼垂釣者分我半苔磯

修真院訪崔道士

竹扉蒼蘚墻林下小丹房風定香煙直月斜簾影長淪茶
泉味別點易露痕香安得棲塵外求師却老方

春遊和胡叔芳韻

春光潑眼明占勝得新亭棠醉風扶起柳眠鶯喚醒非無
益泛綠安得鬢皆青且事日爲樂歌聲莫暫停

山亭避暑

怕礙清風入丁寧莫下簾地皆宜避暑人自要趨炎竹色
水千頃松聲風四簷此中有幽致多取未傷廉

三山旅夜

獨坐本無况淒涼更旅中檻低簷礙月窗破紙吟風隣館
笛三弄譙樓鼓三通半鷓聊自適新荔擘輕紅

枕上偶成

山民詩鈔 二
長夜更難曉天寒吟息清夢魂山館枕燈影雪窗繫守拙
疎生理安貧識世情淒風響簷竹豈是不平聲

泊白沙渡

日暮片帆落渡頭生暝煙與鷗分渚泊邀月共舩眠燈影
漁舟外湍聲客枕邊離懷正無奈况復聽啼鶻

夜話無上人房

蒲團一榻上坐到夜將分牕月燈昏見巖前雨歇聞茶甌
勝飲酒禪語當論文只恐紅塵迹流師松下雲

獨坐

寒齋淡無味孤坐息悠悠時事三緘口年光一轉頭有書
遮老眼無藥療閒愁假使丹心在衰遲也合休

春日

韶光今幾許我欲問流鶯花影掃不去草根鋤又生心安
諸妄息身老萬緣輕正是春風好幽蘭不肯爭

曉行山間

出門誰是伴只約瘦藤行一二里山逕兩三聲曉鶯亂峰
相出沒初日乍陰晴僧舍在何許隔林鐘磬清

山間次李芳宿韻

好山多在眼塵事少關心風竹有聲畫石泉無操琴許猿
分野果畱鶴守雲林不是閑邊客誰來此地吟

春感

春光元自好我却爲春愁但見柳青眼不如人白頭一身
浮似寄百歲去如流賴有芳樽在花前日醉遊

春曉園中

綠陰留我立清曉小關東林外一鳩雨柳邊雙燕風吟懷
愁渺渺春事去匆匆莫恨芳菲盡葵榴花又紅

溪行

春暖溪西路行吟又幾迴水清明白鷺花落失青苔雲過
日吞吐樹搖風往來漁歌聽未了欲去又徘徊

渡江之越宿蕭山縣

昨夜大江舟今宵小驛樓隻身千里客孤枕一燈秋市酒
難成醉鄉書莫寄愁胸中無史記浪作會稽遊

宿寶勝寺

苦吟吟未了只向兩廊行月去塔無影風來鐸有聲塵心
隨水淨佛眼共燈明安得雲邊住與僧分此情

閉居

虛明兩竹窻濟楚一書房風動鳥移樹花香蝶過牆身安
知病少晝靜覺春長未必全無事終焉也勝忙

兵後寓舍春

觸景多懷舊凭欄易愴神飛花遊蕩子古木老成人世換
山如醉田荒草自新鄉關渺何處回首暗風塵

兵後劉秀寬見過

冉冉歲云暮閉居安所之途窮身是累痛定語猶悲衰鬢
數莖雪空囊一卷書儒衣例如此惜也不逢時

清明

清明今日是原上一經過新塋塚無數未來入更多此生
曾悟否不樂復如何莫待澆墳土樽前且醉歌

臨江曉行

茅舍亂鷄聲疎林淡見星霜輕留草綠霧暗失山青蹤跡
去來燕交遊聚散萍浮生原是客不必恨飄零

舟中峽口

亂山如碧玉處處見鷓鴣花水漲傍分港舟行倒走沙宿依
沽酒市飯過釣魚家喜脫風波險推蓬數暝鴉

次韻章劔溪山居

想無書赴隴林鶴莫驚猜曳杖雲同出開簾山自來池堪
供洗硯籬不得觀梅靜倚長松立藤花點翠苔

夏日

虛窗暑亦涼境靜晝偏長樹色煙明滅蟬聲風抑揚家貧
書是業身老睡爲鄉赤日黃埃客紛紛爲底忙

宋道士同遊白雲關

扶攜方外友來入白雲關八九峰如畫雨三人倚欄棋聲
敲竹外簾影落花間一曲瑤琴罷翠陰生晝寒

妙因寺次施敬所韻

松蘿一徑陰踏破白雲淡約客分茶供逢僧倚竹吟鼠留
香篆迹禽和閣鈴音話久不知晚新螢照出林

晚春

有恨青春老無營白晝長葉新林換綠花落地生香雨意
一番足人家百事忙爲儒竟成悞悔不早農桑

冬雪

雪凍飛禽少林淡落葉多寒塘倒山影空谷答樵歌不有
梅花在其如詩息何霜風吹落帽應歎鬢絲皤

新涼

煙火林幽處田園秋暮時
淡村人到少閨月稻黃遲
旋決渠分水新編竹補籬
地爐煨芋栗莫遣貴人知

江樓

樓高古城遠無奈漏聲催
幽夢風吹斷新吟月送來
江長漁唱遠雲冷雁聲哀
明日重陽酒黃花菊未開

初夏訪劉道士

白雲隨杖屨伴我到山房
暑薄疑天別林深見路長
木芝皆道味花竹亦詩香
更待荷花後來分半榻涼

春行

東風物物新花外步清晨
蕉葉卷舒雨鳩聲問答春
園林三月景詩酒百年身
試數交遊侶如今有幾人

孤標上人留宿

山僧留我宿我亦似山僧
香茗半甌雪寒壺一筩
冰廊風響黃葉壁雨暗青燈
叅透詩三昧何須契一乘

李修伯山居

寒燈幾撥盡借問夜何其
舊夢青燈在新愁白髮知
昔爲三遶鵲今作五藏龜
多謝梅梢月留人得睡遲

道逢過軍投宿山寺

窮途欲焉往薄暮此相投
蟋蟀數聲雨芭蕉一寺秋
鄉關來枕畔時事上眉頭
長歎爲僧好今逢更說愁

溪舟中

一舸下中流西風兩岸秋
櫓聲搖客夢帆影掛離愁
落日魚鰕市長煙蘆荻洲
篙人夜相語明發又嚴州

春曉雨

破曉簷花未放乾，披衣和夢倚欄干。釀成苔暈地猶濕，老
盡鶯聲風正寒。無客醉敲金鞮響，有人睡怯翠衾單。牡丹
一夜成消瘦，下却珠簾不忍看。

西湖圖

兩袖春風一丈池，等閑踏破柳橋西。雲開遠嶂碧千疊，雨
過落花紅半溪。青旂有情邀我醉，黃鶯無恨爲誰啼。東城
正在桃林外，多少遊人逐馬蹄。

遊鳳棲寺

十載重遊古鳳棲，連宮新遶綠楊堤。欲談世事佛無語，不
管客愁禽自啼。苔滑空廊妨散步，塵昏老壁失留題。僧家
山地鄰家種，菜甲春生綠滿畦。

漁浦晚秋旅懷

西風吹夢越中遊，剪剪輕寒入短裘。雁字不將鄉信寫，蛩
聲空和旅吟愁。郵亭冷雨孤燈夜，漁市斜陽一笛秋。是處
山川卽吾上，仲宣何用怯登樓。

泊舟嚴灘

天色微茫入暝鐘，嚴陵湍上繫孤蓬。水禽與我共明月，蘆
葉同誰吟晚風。隔浦人家漁火外，滿江愁思笛聲中。雲開
休望飛鴻影，身卽天涯一斷鴻。

連城春夜畱別張建溪

飛絮遊絲客子心，連城那忍遽分襟。青燈應見詩情苦，濁
酒不如交味淡。一榻暖風棲竹屋，半闌淡月立花陰。離懷
今夜先收拾，盡付明朝馬上吟。

夜坐

匹馬平生汗漫游如今寂寞老林秋小窗半夜青燈雨幽
樹一庭黃葉秋懶看世情寧睡去怕傷時事莫吟休寒蛩
可是知人意未到莎根只說愁

初冬

林葉新經數夜霜地爐獨擁一山房塵書邀我共高閣濁
酒勸人歸醉鄉費省家貧還似富身閑日短亦如長梅花
苦欲催吟興又破梢頭半點香

東粵廟

頽欄斜照網蛛絲陳迹淒涼萬古悲柘水尚鳴亡國怨山
松曾見受封時碑因苔蝕無完字城爲田侵失舊基當日
東甌知幾戰如今贏得一荒祠

歲暮

顏不常朱鬢易斑流光難駐兩跳丸一年又是等閑過百
歲只消如此看把酒何會長在手種桃能得幾凭欄癡人
醉夢不知醒日夜雙眉祇死攢

三峰寺

寂寞煙林噪亂鴉青鞋步入野僧家雲淡不碍鐘聲出日
轉還移塔影斜廊下蝸粘松砌蘚佛前蜂戀插瓶花竹床
紙帳清如水一枕松風聽煮茶

江頭春日

風暖旗亭煮酒香醉醒始悟是他鄉駕言行邁路千里豈
不懷歸天一方春事漸消鶯語老離愁偏勝柳絲長無聊
莫向城南宿淡月梨花正斷腸

次韻潘怨堂見寄

抱瓮區區老漢陰空齋擁鼻日長吟青山隔截市朝面白
髮消磨豪傑心書既無成休學劔貴無可買恥言金情知
不入鴛鴦侶賴有鷗盟尚可尋

初夏

一薰風帶暑回雨天濃翠與庭槐不隨春去鶯猶在好
競時妝櫛又開剪刀旋裁新白苧盃盤聊薦舊青梅篋中
敝扇投閒久依舊團團入手來

夜飲趙園次徐君實韻

銀臺絳蠟淚成堆四面軒窗盡放開花影忽生知月到竹
稍微響覺風來豪揮彩筆詩千首醉倚紅妝酒百盃遊玩
未闕歸未得高城漏箭幾相催

幽樓

鶴護松扉久不開蒲團端坐息悠哉故交只向夢中見閑
事不經心上來雙屐躡雲春採藥一筇掛月夜觀梅東風
似見山童懶自與幽人埽徑苔

聖果院訪忠上人不值

管領東風入杖藜落梅香裏已招提苔痕一徑白雲濕花
影半窗紅日低欲見高僧聊爾耳便乘餘興去來兮葛藤
有話無人共付與隔林幽鳥啼

山行

林梢初日弄陰晴露浥溪花笑欲迎澗暗只聞泉滴瀝山
青剩見鷺分明遠峰忽轉還如遠險徑徐行亦似平莫謂
詩成無與和風篁也解作吟聲

秋夜次葉一山韻

山長詩金
自笑秋來似轉蓬偶然飛落過山中一燈幽館菊花雨孤
枕小樓梧葉風涉世悠悠旋磨蟻懷人杳杳寄書鴻浮生
何預光陰事抵死相催作老翁

杜鵑花得紅字

愁鎖巴雲往事空只將遺恨寄芳叢歸心千古終難白啼
血萬山都是紅枝帶翠煙淡夜月魂飛錦水舊東風至今
染出懷鄉恨長掛行人望眼中

永嘉秋夕

風戰枯桐敲紙窗擁裘無寐夜偏長樵樓三鼓夜將午雲
雁數聲天正霜寓世此身驚逆旅寬懷何處不吾鄉江頭
風景日堪醉酒美蟹肥橙橘香

客中遇鄉友李芳遠歸省親

河梁邂逅話襟期獵獵西風透袂衣酒臉未隨紅葉醉鄉
心先逐白雲飛客中送客難爲別山上安山胡不歸借使
家書君可寄此間無復問庭幃

山人家

片雲隔斷嶂西風三兩山花屋角紅幾畝桑麻春社後數
家雞犬夕陽中拾薪澗底青裙婦倚杖簷間白髮翁我亦
願來同隱者種桃早晚趁東風

朱溪澗

路轉峰回又一村天寒大半掩柴門雲融山脊嵐生翠水
嚼沙洲樹出根任擁重裘風亦冷未投荒店月先昏今宵
只傍梅花宿羸得清氛入夢魂

閑中

敢咎章縫解誤人甘於閑處著閒身腹中書在溫仍熟夢
裏詩成記不真引鶴徐行三逕曉約梅同醉一壺春今朝
有喜誰知得新換銜頭號散民

冬暮小齋

布襪青鞋敝絮袍松扉柴几小衡茅雲酣纔釀臍三月梅
吐又橫春一梢炭爲驟寒偏索價酒因不飲懶論交窮年
兀兀從人笑未用多方作解嘲

宿南峰寺

禪房花木鎖深幽借與詩人信宿留幡影分來半廊月磬
聲敲破一林秋僧偏好事能青眼佛本無心亦白頭試問
青松峰外鶴閑邊曾見幾人遊

春曉山行

風掃連陰出快晴瘦筇伴我出山扃路從初日紅邊過人
在野花香裏行古水殊無趨世態幽禽懶作弄春聲棕鞋
踏遍山南北只與白雲相送迎

幽興

不賦千鍾賦一簞天公有意養痴頑書猶能看未曾老詩
亦莫吟方是閑寬著庭除貪貯月少栽竹樹要觀山空階
兩日無行迹又上苔花幾點斑

梅仙山

梅福鍊丹地

西都不知壽安用獨長年縱有丹爐在難吹漢火燃

吉水夜泊

入夜始維舟黃蘆古渡頭眠鷗知讓客飛過蓼花洲

草

草枯根不死春到又敷榮獨有愁根在非春亦自生

楊妃

三郎掩面馬嵬坡生死恩深可奈何瘞土驛傍何足恨潼關戰處骨埋多

年少遊春

錦袍朱帶玉花驄著意追歡紫陌東只道春風屬楊柳不知楊柳有秋風

三月晦日

九十風光能有幾東風遽作遠行人樽前莫惜今朝醉明日鶯聲不是春

晚步

未暝先啼草際蛩石橋暗度晚花風歸鴉不帶殘陽老畱

得林梢一抹紅

春歸詞

愁鎖眉尖未肯消何心更待兩娥嬌一春螺黛渾無用付與東風染柳條

山間秋夜

夜色秋光共一闌飽收風露入脾肝虛簷立盡梧桐影絡緯數聲山月寒

新年

妝點春光到眼邊凍消殘雪暖生煙杏桃催換新顏色惟有寒梅老一年

九日

懶把黃花插滿頭正緣老大見花羞年來頗恨儒冠悞好

倩西風吹去休

醉餘再賦

堪歎詩翁酒興豪醉餘猶復一登高西風抵死相搖撼爭
奈儒冠裹得牢

水雲詩鈔

汪元量字大有號水雲錢唐人以善琴事謝后王昭儀
宋亡隨三宮留燕後為黃冠師南歸幼主平原公及從
降駙馬右丞楊鎮丞相吳堅留夢炎叅政家鉉翁文及
翁提刑陳杰與王昭儀清惠以下廿有九人賦詩餞之
後往來匡廬彭蠡間世莫測其去留危太史素謂其長
身玉立脩髯廣頰而音若洪鐘江右人以為神仙多畫
其像祀之詩多紀國亡北徙事與文丞相獄中倡和作
周詳惻愴人謂之詩史鄭明德陶九成瞿宗吉所載僅
數首虞山錢牧齋得之雲間鈔書舊冊錄為水雲集

湖州歌九十八首

丙子正月十有三搥鞞伐鼓下江南皋亭山下青烟起宰

靴相看似醉酣
萬馬如雲在外間
玉階仙仗罷趨班
三宮北面議方定
遣使皋亭慰伯顏

殿上羣臣嘿不言
伯顏丞相趣降箋
三宮共在珠簾下
萬騎虬鬚遶殿前

謝了天恩出內門
駕前喝道上將軍
白旄黃鉞分行立
一點猩紅似幼君

一舸吳山在眼中
樓臺叠叠開青紅
錦帆後夜烟江上手
抱琵琶憶故宮

北望燕雲不盡頭
大江東去水悠悠
夕陽一片寒鴉外
目斷東西四百州

十數年來國事乖
大臣無計逐時挨
三宮今日燕山去
春草凄凄上玉階

錦帆高揭繡簾開
鼙鼓聲悲鳳管哀
月子纖纖雲裏見
吳江不盡莫潮來

一出宮門上畫船
紅紅白白艷神仙
山長水遠愁無那
又見江南月上弦

太湖風起浪頭高
錦柁搖搖坐不牢
靠着篷窗垂兩目
船頭船尾爛弓刀

昨夜三更淚濕腮
伍胥何事夢中來
三宮從此相分別
自勒潮頭白馬迴

受帝城下草離離
寒食清明只自悲
漢寢秦陵何處在
鶯花無主雨如絲

金陵昨夜有降書
更說揚州一戰輸
淮北淮南清未了
又

添軍馬下東吳

鐵甕城頭馬亂嘶金陵城下砲如飛黑風捲地鼓聲急昨夜常州又受圍

曉來宮權去如飛掠髮鬢雲淺畫眉風雨淒淒能自遣三三五五坐彈碁

莫雨蕭蕭酒力微江頭楊柳正依依宮娥抱膝船窓坐紅淚千行濕繡衣

曉鬢鬢鬆懶不梳忽聽人說是南徐手中明鏡拋船上半揭篷窓看打魚

京口沿河賣酒家東邊楊柳北邊花柳搖花謝人分散一向天涯一海涯

滿船明月夜鳴榔船上宮人燒夜香好是燒香得神力片帆穩送到漁陽

一片淮山落照中開船忽遇打頭風行軍元帥傳言語別撥官軍下浙東

揚子江頭潮退遲三宮船傍釣魚磯須臾風定過江去新鬼啾啾舊鬼啼

不堪回首淚盈盈萬里淮河聽雨聲莫問萍蘆併豆粥且餐麥飯與魚羹

宰執連鑣向北行淮西夜夜鬼燈青雖然適意無南北生歎難逃篩下星

更闌多燭繡筵遮卸却金鈿與翠花心似亂絲眠不得江樓中夜咽悲笳

兩淮極目草芊芊野渡灰餘屋數椽兵馬渡江人走盡民

船拘斂作官船

宮人清夜按瑤琴不識明妃出塞心十八拍中無限恨轉絃又奏廣陵音

青天澹澹月荒荒兩岸淮田盡戰場宮女不眠開眼坐更聽人唱哭襄陽

翠鬟半鞦倦梳粧楊柳風前陣陣涼絃索懶拈縮纖手龍涎猶嚼口脂香

鳳管龍笙處處吹都民歡樂太平時宮娥不識興亡事猶唱宣和御製詞

可憐河畔草青青錦纜牽江且緩行愛此淮南山水好問天乞得片時晴

丞相催人急放舟舟中兒女淚交流淮南漸遠波聲小猶見揚州望火樓

撥盡琵琶意欲悲新愁舊夢兩依依江樓吹笛三更後細奈林間杜宇啼

一半淮江半浙江怒潮日夜自相撞揚州昨夜軍書至說道淮安未肯降

曉來潮信暫相留滿耳驚濤愁復愁月殿不知何處在錦帆搖曳到揚州

金屋煌煌麗九天朝歌夜舞艷神仙尋常只道西湖好不識淮南是極邊

風雨聲中聽權歌山魚野饌奈愁何雪花堆白甜如蜜不減江桃滋味多

九尺瓊花一夜開無雙亭曲小徘徊可憐后土空祠字望

斷韋郎不見來

兩淮戰鼓不停過萬騎精兵賽夜叉破陣焚舟彈指頃漢人猶懼夏爺爺

官軍兩岸護龍舟麥飯魚羹進不休宮女垂頭空作惡暗拋珠淚落船頭

都人不識有干戈羅綺叢中樂事多一夜月明天漠漠漢人歌罷楚人歌

太皇太后過江都遙指淮山是畫圖拋却故家風雨外夜來歸夢遶西湖

萬騎橫江泣鼓鞞千枝畫角一行吹淮南今夜好明月船上美人空淚垂

蘆荻颼颼風亂吹戰場白骨暴沙泥淮南兵後人烟絕新

雨燈前醉玉妃

篷窗倚坐酒微酣淮水無波似蔚藍雙槽呶啞搖不住望中猶自是江南

銷金帳下忽天明夢裏無情亦有情何處亂山可堆骨暫時相對坐調笙

宮人夜泊近人家瞥見紅榴三四丫猶說初離行在所玉蘭無數牡丹花

絲雨綿雲五月寒淮堧遺老笑儒冠行軍元帥來相探折送駝峰炙一盤

江南楊柳舞婆娑萬馬成羣噉短莎北客醉中齊拍手隔船猶唱采茶歌

長淮風定浪濤寬錦櫂搖搖上下灣兵後人烟絕稀少可

勝戰骨白如山

使臣開闢過高郵楊柳絲絲拂去舟宮女推篷猶自笑閒
拋金彈打沙鷗

邵伯津頭闌未開山城鼓角不勝哀一川霞錦供行客且
掬荷香進酒杯

北風吹雨入篷間宮女腰肢瘦怯寒阿監隔船相借問計
程今日到淮安

寶應城南柳數株葭墻艾席是民居眼前境逆無詩興忽
有小舟來賣魚

船泊邳州古岸傷斜風細雨送昏黃美人十十船中坐猶
把金猊注好香

徐州城上覓黃樓四壁詩章讀不休更欲登臺看戲馬州
官攜酒共嬉遊

歌風臺畔水泔泔地面官人餽酒葷宮女上船嬉一霎不
禁塵土污衣裙

新濟州來舊濟州柳門西畔兩三鷗酒邊笑謔消長日弄
竹彈絲盡勝流

一更船泊鄆州城城外巡軍夜柝鳴如此月圓如此客猶
能把酒到天明

琵琶切切更嘈嘈高柳羣蟬逐不號一片夕陽無限好汶
河西上酒樓高

錦帆百幅礙斜陽遙望陵州里許長車馬爭馳迎把盞走
來船上看花娘

兀兀篷窗坐似禪景州城外更凄然官河宛轉無風力馬

曳驢拖鼓子船

灌州河水曲如弓，青草坪邊官向東。船過州南忽奇絕，一如湖上藕花風。

船到滄州且少留，客來同上酒家樓。沿河樹折棗初剝，滿地藤枯瓜未收。

牙檣暫住獻州城，鷺去歸來管送迎。卧笑宮人擲骰子，金錢癡咒卜輸贏。

日中轉柁到河間，萬里羈人強自寬。此夜此歌如此酒，安安月色好誰看。

長蘆轉柁是通津，盡是東西南北人。日暮烟花簫鼓鬧，紅樓爛醉楚州春。

恰到楊邨舊馬頭，北風吹雨便成秋。嗚嗚鬼物敗人興，掩却篷窗且睡休。

滿朝宰相出通州，迎接三宮晏不休。六十里天圍錦帳，素車白馬月中游。

會同館裏紫蒙茸，蘭麝飄來陣陣風。簫鼓沸天迴雁舞，黃羅帳幔燕三宮。

皇帝初開第一筵，天顏問勞意綿綿。大元皇后同茶飯，晏罷歸來月滿天。

第二筵開入九重，君王把酒勸三宮。駝峰割罷行酥酪，又進椒盤剝嫩葱。

第三筵開在蓬萊，丞相行杯不放杯。割馬燒羊燉解粥，三宮晏罷謝恩迴。

第四筵開在廣寒，葡萄酒釀色如丹。并刀細割天雞肉，宴

罷歸來月滿鞍

第五華筵正大宮
輓轡引酒吸長虹
金盤堆起胡羊肉
樂指三千響碧空

第六筵開在禁庭
蒸麋燒鹿薦杯行
三宮滿飲天顏喜
月下笙歌入舊城

第七筵排極整齊
三宮游處軟輿提
杏漿新沃燒熊肉
更進鵝鶉野雉雞

第八筵開在北亭
三宮豐燕已恩榮
諸行百戲都呈藝
樂局伶官叫點名

第九筵開盡帝妃
三宮端坐受金卮
須臾殿上都酣醉
拍手高歌舞雁兒

第十瓊筵敞禁庭
兩邊丞相把壺瓶
君王自勸三宮酒
更送天香近玉屏

一人不殺謝乾坤
萬里來來謁帝闈
高下受官隨品從
九流藝術亦沾恩

僧道恩榮已受風
上庠儒者亦恩隆
福王又拜平原郡
幼主新封瀛國公

金屋粧成物色新
三宮日用御厨珍
其餘宮女千餘箇
分嫁幽州已斷輪

每月支糧萬石鈞
日支羊肉六千斤
御厨請給葡萄酒
別賜天鵝與野麇

三宮寢室異香飄
貂鼠擅簾錦繡標
花毯褥裯三萬件
織金鳳被八千條

客中忽忽又重陽
滿酌葡萄當菊觴
謝后已叨新聖旨
謝

家田土免輸糧

雪裏天家賜炕羊兩壺九醞紫霞觴三宮夜給千條燭更
賜高麗黑玉香

三殿加餐強自寬內家日日問平安大元皇后來相探特
賜絲紬二百單

萬里修途似夢中天家賜予意無窮昭儀別館香雲煖自
把詩書授國公

萬里羈孤夜憶家邊城吹角更吹笳須臾勅使傳言語今
日天庭賞雪花

雪子飛飛塞面寒地爐石炭共圍樂天家賜酒十銀甕熊
掌天鵝三玉盤

江南郡守列金階內裏華筵日日排文武官僚多二品還

鄉盡帶虎頭牌

四川督帥尚寵豪萬馬來燕只一遭奏授虎符三百面內
家更賜織金袍

九重黃燭照簾櫳三殿乘輿去賀冬金面垂慈多喜色史
官書瑞奏年豐

曉望燕雲正雪天閉門種帳恣高眠內家遺鈔三千錠添
賜三宮日用錢

東宮雪裏燕三宮妃子殷勤把酒鍾百十筵篔簹玉指兩
行珠翠擊金鑪

夜來酒醒四更過漸覺衾裯冷氣多踏雪敲門雙勅使傳
言太子送天鵝

兩下金欄幃御階異香縹緲五門開都人罷市從容立迎

接南朝駙馬來
杭州萬里到幽州
百咏歌成意未休
燕玉偶然通一笑
歌
疾宛轉作吳謳

越州歌

淮南四畔草離離
萬檝千艘木土飛
旗幟蔽江金鼓震
伯顏丞相過江時
東南半壁日昏昏
萬騎臨軒趣幼君
三十六宮隨輦去
不堪回首望吳雲
一陣西風滿地烟
千軍萬馬浙江邊
官司把斷西興渡
要奪漁船作戰船
西峰雲鎖幾時開
昨夜京城戰鼓哀
漁父生來載歌舞
滿頭白髮見兵來

秋風吹雨暗天涯
越鳥巢翻何以家
嶺上萬松都斫盡
西湖新路欲排叉

師相平章誤我朝
千秋萬古恨難銷
蕭牆禍起非今日
不賞軍功在斷橋

蒼生慟哭入雲霄
內苑瓊林已作樵
打斷六更天未曉
禁庭兩桁帆盤燒

魯港當年傀儡場
六軍盡笑賈平章
三聲鑼響三更後
不見人呼大魏王

脫却黃袍心莫欺
魏王事業止丁斯
孤舟走過揚州去
表奏朝廷乞太師

賈廟巍巍盡勅封
秦齊兩國受恩同
木綿庵下無依鬼
合策麒麟第一功

集芳園裏策奇功丞相南行面發紅留得紫綿三百曲風
吹雨打併成空

羣臣上疏納忠言國害分明在目前只論平章行不洽公
田之後又私田

甲子初秋柳宿垂皇天無雨只空雷正當七月初三夜帝
勸長星酒一杯

絲風毛雨共淒涼燕子樓空恨恨長今日客逢新酒熟夜
來春去落花忙

月夜湖歌歌正長船來船去水茫茫上塘歌了下塘唱更
唱吳王與越王

昨夢吳山閨苑開風吹仙樂下瑤臺翠圍紅陣知多少牛
揭珠簾看駕來

鼇山月照人嬌宣德門前萬玉妃記得那年三五夜快
行擎駕到行歸

內湖三月賞新荷錦纜龍舟緩緩拖醉裏君王宣樂部隔
花教唱採蓮歌

年年宮柳好春光百轉黃鸝遠建章冶杏天桃紅勝錦牡
丹屏裏燕諸王

苦夢吳山列御筵三千宮女燭金蓮而今莫說夢中夢夢
裏吳山只自憐

醉歌

呂將軍在守襄陽十載襄陽鐵脊梁望斷援兵無信息聲
聲罵殺賈平章

援兵不遣事堪哀食肉權臣大不才見說襄樊投拜了千

軍萬馬過江來

淮襄州郡盡歸降，鞞鼓喧天入古杭。國母已無心聽政書，生空有淚成行。

六宮宮女淚連連，事主誰知不盡年。太后宣傳許降國，伯

顏丞相到簾前。

亂點連聲

一作花底傳籌

殺六更熒熒庭燎待天明

一作風吹庭燎滅還明

侍臣已寫歸降表

一作奏罷降元表

臣妾僉名謝道清

衣冠不改只如先，關會通行滿市廛。北客南人成買賣，京

城依舊使時錢。

北師要討撒花銀，官府行移過市民。丞相伯顏曾有語，學

中要揀秀才人。

湧金門外雨晴初，多少紅船上下趨。龍管鳳笙無韻調，却

搥戰鼓下西湖。

南苑西宮棘露牙，萬年枝上亂啼鴉。北人環立欄干曲，手

指紅梅作杏花。

伯顏丞相呂將軍，收了江南不殺人。昨日太皇請茶飯，滿

朝朱紫盡降臣。

賈魏公出師

奏罷出師表，翻然辭廟堂。千艘空寶玉，萬馬下錢塘。許

命真主，欺孤欲假王。可能清海岱，宗社再昌唐。

孫殿帥從魏公出師

我宋麒麟閣，功當向上名。出師休背主，誓死莫偷生。社稷

逢今日，英雄在此行。勿為兒女態，一笑欲傾城。

魯港敗北

夜半過金鼓南邊事已休三軍坑魯港一舸走揚州星殞
天行泣江喧地欲流欺孤生異志回首媿東

北師駐皋亭山

錢塘江上雨初乾風入端門陣陣酸萬馬亂嘶臨警蹕三
宮垂淚濕鈴鸞童兒空想一作追徐福厲鬼終當滅賀蘭
苦議和親休練卒一作苦說和親能活國嬋娟剩遣一作嫁呼韓

杭州

有客回陽九無人髮握三關中新約浚江左舊清談鐵騎
來天北樓船過海南一枝巢越島八繭熟吳蠶
天也今如此人乎可奈何臺邊西子去宮裏北人過玉樹
歌方息金銅淚已多旌旗遮御路舟楫滿官河

杭州雜和林石田

石田林處士唸鏡靜無塵亂後長如醉愁來不爲貧飯蔬
留好客筆硯老斯人近浚秦州體篇篇妙入神
先生忘富貴久客幸平安髮已千莖白心猶一寸丹衣冠
前進士家世舊郎官醉入烏程里吟登李杜壇
逃難藏淡隱重逢出近詩乾坤一反掌今古兩愁眉我作
新亭泣君生舊國悲向來行樂地夜雨走狐狸
蠅也吞聲哭潛行到水頭人誰包馬革子獨取羊裘北面
生何益南冠死則休百年如過翼撫掌笑孫劉
一春雲幕幕三月雨淋漓魚菜不歸市鶯花空滿林人行
官巷口兵簇御街心老子猖狂甚猶歌梁父吟
烽火來千里狼烟渡六橋嶺寒蒼兕叫江曉白魚跳壯士
披金甲佳人弄玉簫偶餘尊酒在聊以永今朝

躡足封韓信、剖心噴比干、河山千古淚、風雨一番寒、世指
鹿爲馬、人呼鳥作鸞、江頭潮淘淘、城脚水漫漫、
吟身春共瘦、獨立望江亭、越水荒荒白、吳山了了青、軍降
欣解甲、民喜罷抽丁、拍碎關千曲、吞聲血淚零、
此夕知誰夕、游船雜戰船、山河空百二、宮闕設三千、雨歇
雲垂地、潮平水接天、惜哉無祖述、誰官着先鞭、
陵廟成焦土、宮墻沒野蒿、亡秦皆趙李、佐漢獨蕭曹、國子
乘黃貴、山人衣白高、飛埃猶黯黯、逝水正滔滔、
靜看縱橫士、翻成買賣兒、禁中驚戰鼓、城上出降旗、魏操
非無漢、唐高不有隋、從茲史革後、寧復太平期、
偶出西湖上、新蒲綠未齊、攜來編縮項、買得蟹團臍、問酒
入新店、喚船行舊堤、亂離多殺戮、水畔幾人啼、

天目絲絲雨、江頭剪剪風、鼓鞞千艇合、刁斗萬家同、金馬
憐焦土、銅駝壓草叢、杞天愁欲墮、黑入大陰中、

日月往來轂、乾坤生殺機、江春蛟妾舞、塞煖雁奴歸、送客
詩添債、愁城酒破圍、如何秦相國、昨夜號韓非、

如此只如此、無聊酒一尊、江山猶昨日、笳鼓又新元、黑潦
迷行路、黃埃入禁門、皋亭山頂上、百萬漢軍屯、

世變長椎髻、時更短後衣、魏庭翁仲泣、唐殿子孫非、樹禿
鴉爭集、梁空燕自歸、斷橋春已莫、無限柳花飛、

春去雨方歇、水流花自飛、人生螻蟻夢、世道衣日月、
東西驛、乾坤闔闔扉、斯令無二子、空有首陽薇、

假途虞滅虢、嘗膽越吞吳、黑白一棋局、方圓八陣圖、是翁
猶矍鑠、諸老自揶揄、喟嘆投麟筆、悲歌擊唾壺、

竟夕柴門掩無心接縉紳山中多樂事世上少全人諸呂
幾亾漢商翁不仕秦柴桑淡僻處亦有晉遺民
天下愁無盡生前樂有涯文章一小技富貴摠虛華塵入
金張宅草生王謝家可憐三日火不見八姨車
休休休休休干戈盡白頭諸公雲北去萬事水東流春雨
不知止晚山相對愁呼童攜牛酒我欲一登樓

錢塘

躑躅吞聲淚暗傾杖藜徐步浙江行平蕪古路人烟絕綠
樹新墟鬼火明事去玉環沉異域愁來金盃出佳城十年
草木都糜爛留得南枝照淺清

錢塘歌

錢塘江上龍光歿錢王宮闕今如此白髮宮娃作遠遊漢

漠平沙千萬里西北高樓白雲齊欲落未落日已低古人
不見今人去江水東流烏夜啼

又

西塞山邊日落處北關門外雨來天南人墮淚北人笑臣
甫低頭拜杜鵑

北征

北師有嚴程挽我投燕京挾此萬卷書明發萬里行出門
隔山嶽未知死與生三宮錦帆張粉陣吹鸞笙遺民拜路
傍號哭皆失聲吳山何青青吳水何泠泠山水豈有極天
地終無情回首叫重華蒼梧雲正橫

宋宮人分嫁北匠

皎皎千嬋娟盈盈翠紅圍輦來路迢迢梳鬟理征衣復采

鴛鴦花綴之連理枝憂愁忽已失歡樂當自茲君王不重
色安甯留金閨再令出宮掖相看淚交垂分配老斲輪強
顏相追隨舊恩棄如土新寵豈所宜誰謂事當爾苦樂心
自知含情理金徽煩聲亂朱絲一彈丹鳳離再彈黃鵠飛
已恨聽者少更傷知音稀吞聲不忍哭寄曲宣餘悲可憐
薄命身萬里榮華衰江南天一涯流落將安歸向來承恩
地月落夜烏啼

酬王昭儀

愁到濃時酒自斟挑燈看劔淚痕淡黃金臺愧少知己碧
玉調將空好音萬葉秋風孤館夢一燈夜雨故鄉心庭前
昨夜梧桐雨勁氣蕭蕭入短襟

太皇謝太后挽章

羯鼓喧吳越傷心國破時雨闌花洒淚烟苑柳顰眉事去
千年速愁來一歎遲舊臣相弔後寒月墮燕支
大漠陰風起羈孤血淚懸忽聞天下母已赴月中仙哀樂
浮雲外榮枯逝水前遺書乞骸骨歸葬越山邊

平原郡公夜宴

春事闌珊夢裏休他鄉相見淚空流柳搖楚館牽新恨花
落吳山憶舊遊渴想和羹梅已熟饑思進飯麥初收瀛洲
歸去琅玕長月朗風薰十二樓

平原郡公趙福王挽章

大王無起日草木盡傷悲生在太平際死當離亂時南冠
流遠路北面幸全屍舊客行霜霰呼天淚濕塵

答同舍杜德機

北風吹我上金臺忍見蛾眉墮馬嵬宴罷蟠桃王母去江
南腸斷賀方回

答方石田

南朝千古傷心事每閱陳編淚滿襟我更傷心成野史人
看野史更傷心

答徐雪江

十載高居白玉堂陳情一表乞還鄉孤雲落日度遼水匹
馬西風上太行行橐尚留官裏俸賜衣猶帶御前香只今
對客難爲答千古中原話柄長

御宴蓬萊島

曉日重闌對冕旒內家開宴擁歌謳駝峰縷割分金盃馬
乳時傾泛玉甌禁苑風生亭北曲寢園月轉殿西頭山前

山後花如錦一朵紅雲侍輦遊

幽州歌

漢兒辮髮籠氊笠日暮黃金臺上立臂鷹解帶忽放飛一
行塞雁正泣

幽州除夜醉歌

燕姬壓酒春宵永列炬搖光拂紅影銀鴨香烘雲母屏綺
窗繡閣流芳馨晚管聲含蘭氣嬌鳳釵拖頸烏雲飄錦瑟
無端促絃急纖娥斂翠翻成泣雕龍啁晰鷄鳴早一笑紅
顏鏡中老

除夕同舍集飲

萬里陰寒淚欲流暫時歡笑且忘憂已呼赤脚來烹雁更
遣蒼頭爲割牛燕妓女來情不惡魯男子在話難投却憐

半夜朝天去霜瓦差差絳玉樓

幽州會飲

客路相逢在異鄉佐樽先得杜韋娘舞迴錦臂花爭艷醉
吸金波月鬪光他日未忘今日樂老年須記少年狂五陵
遊俠休相笑歸去奚如有錦囊

夷山醉歌

楚狂醉歌歌正發更上梁臺望明月西風獵獵吹我衣絕
代佳人皎如雪搥羯鼓彈箜篌烹羊宰牛坐糟丘一笑再
笑揚清謳遙看汴水波聲小錦纜忘還事多少昨日金明
池上來良嶽淒涼麋鹿遶麥青青黍離離萬年枝上鴉亂
啼二龍北狩不復返六龍南渡無還期金銅淚迸露盤濕
畫闌桂柱酸風急鳩居鵲構蒼隼入蛇出燕巢白狐立東

南地陷妖氛黑雙鳳高飛海南陌吳山日落天沉沉母子
同行向天北關河萬里雨露深小儒何必悲苦辛歸來耳
熱忘頭白買笑揮金莫相失呼奚奴吹簞篋美人縱復橫
今夕復何夕楚狂醉歌歌欲輟老猿爲我啼竹裂
嗚呼再歌兮花滿臺好月爲我光徘徊人生在世不滿百
紛華過眼皆成灰夷山青青汴水綠西北高樓咽絲竹美
人十指纖如玉爲我行觴歌一曲含宮嚼徵當窗牖露脚
斜飛濕楊柳就中有客話陳橋如此山河落人手客且住
聽我語楚漢中分兩丘土七雄爭戰摠塵埃三國鶯花浩
無主咸陽宮殿不復都華清池沼溫泉枯世間興廢奔如
電滄海桑田幾回變人生得意且盡歡何須苦苦爲高官
人生有命且行樂何必區區嘆牢落遮莫金章與玉珂何

如桐江披釣簑遮莫貂蟬貴此身何如柴桑漉酒中君不見海上看羊手持節饑來和雪扣毡嘴又不見飯顆山頭人見嗷愁吟痛飲真吾師美人勸我酒有客有客聽我歌須臾客醉美人睡我亦不知天與地嗚呼再歌兮無人聽月自落兮酒未醒

燕歌行

北風刮地愁雲彤草木爛死黃塵蒙搥鞞代鼓聲瑟瑟金鞍鐵馬搖玲瓏將軍浩氣吞長虹幽并健兒膽力雄車軋軋馳先衝甲戈相撥聲摩空雁行兼貫彎角弓披霜踏雪渡海東鬪血浸野吹腥風捐軀報國效死忠鼓衰矢竭誰收功將軍卸甲入九重錦袍宜賜金團龍天子賜宴葡萄酒烹龍魚鸞割駝峰紫霞激灑琉璃鍾天顏有喜春融融乞與窈窕雙芙蓉虎符腰佩官蓋穹歸來質客皆王公戟門和氣春風中美人左右好花紅朝歌夜舞何時窮豈知沙場雨濕悲風急冤魂戰鬼成行泣

居延

憶昔蘇子卿持節入異域淹留十九年風霜毒顏色啗羶曾牧羝跣足步沙磧日夕思漢君恨不生羽翼一朝天氣清持節入漢國胤子生別離回視如堆礫丈夫抱赤心安宵淚沾臆

長城外

飲馬長城窟馬頭水枯竭水竭將奈何馬嘶不肖歇君看長城中盡是骷髏骨骷髏幾千年猶且未滅沒空啣千年冤此冤何時雪祖龍去已遠長城久迸裂嘆息此骷髏夜

夜江秋月

寰州道中

窮荒六月天地有一尺雪孤兒可憐痛哀哉淚流血書生
不忍啼尸坐愁欲絕擊鼓夜達明角笳競於悒此時入骨
寒指墮膚亦裂萬里不同天江南正炎熱

山東飛放

天子出獵山之東臂鷹健卒豪且雄我欲從之出雲中坐
看萬馬如遊龍

潼關

蔽日烏雲陰不開昏昏勸馬度關來綠蕪逕路人千里黃
葉郵亭酒一杯事去空垂悲國淚愁來莫上望鄉臺桃林
塞外愁煙起大漠天寒鬼哭哀

函谷關

西風吹我度函關古壑泉聲靜自閒老子騎牛沙上去仙
人化鶴苑中還斷崖水脫縣殘日絕域雲橫失好山舊說
度關朱履客一聲鷄唱翠微間

畫溪酒邊

夜來飲酒醉如何酒醒方知事轉多趙國未衰廉藺在齊
城將下酈韓過鵲飛月樹無依所龍入風江謾作波忽有
好詩來眼底畫溪榔板唱漁歌

常州

渡頭風起柳搖絲丁卯橋邊屋已稀河草青青淮馬健江
花冉冉海鷗肥一樽酒對三人飲八字帆分兩岸飛天末
有人難問信仲連東去不須歸

石頭城

石頭城上小徘徊世換僧殘寺已灰地接汴淮山北去江
吞吳越水東來健魚奮鬣隨蛟舞快鶻翻身獵雁回一片
降旗千古淚前人留與後人哀

金陵

只見空城不見臺客行搔首共徘徊風雲舊日龍南渡宇
宙新秋雁北來三國衣冠同草莽六朝宮殿總塵埃交游
相見休相問把手江頭且一杯

揚州

重到揚州十載餘畫橋雨過月模糊后皇廟裏花何在揚
帝堤邊柳亦枯陂麥青青嘶亂馬城蕪冉冉落羣鳥人生
聚散愁無盡且小停鞭向酒壚

徐州

白楊獵獵起悲風滿目黃埃漲太空野壁山墻彭祖宅歷
花糞草項王宮古今盡付三杯外豪傑同歸一夢中更上
層樓見城郭亂鴉古木夕陽紅

邳州

身如傳舍任西東夜榻荒郊四壁空鄉夢漸生燈影外客
愁多在雨聲中淮南火後居民少河北兵前戰鼓雄萬里
別離心正苦帛書何日寄歸鴻

涿州

蘆溝橋下水泠泠落木無邊秋正清牛馬亂鋪黃帝野鷹
鷂高磨涿州城柳亭日射旌旗影花館風傳鼓吹聲歸客
偶然舒望眼酒邊觸景又詩成

通州道中

一片秋雲如太虛，窮荒漠漠亂羣狐。
西瓜黃處藤如織，北棗紅時樹若屠。
雪塞檣砧人戍遠，霜管吹角客愁孤。
幾回兀坐窮廬下，賴有葡萄酒熟初。

封丘

今夜宿封丘，明朝過汴州。
雲橫遮遠塞，水落見長洲。
樹折棗初剝，藤枯瓜未收。
傾囊沽一斗，聊以慰羈愁。

江陵

月到荆江上，輕帆莫遠揚。
水搖龍影動，風送雁聲長。
北斗回秋柄，南辰耿夜光。
徘徊舒一嘯，詩興落瀟湘。

巴陵

重到巴陵秋正清，岳陽城下繫孤舲。
江湖萬里水雲闊，天

地一涼。河漢明月出洞庭，魚婢舞氣蒸。
夢澤雁奴腥，篙工又鼓瀟湘柁。
漁笛漁榔上下鳴。

蜀道

蜀道難行高接天，秦關勒馬望西川。
峨眉翠嶺知何處，劍閣崔巍若箇邊。

長沙

洞庭過了，浪猶高。河伯欣然止怒濤。
傷岸買魚，仍問米登樓。呼酒更持螯。
湘汀暮雨幽蘭濕，野渡寒風古樹號。
詩到巴陵吟不得，屈原千古有離騷。

成都

錦城滿目是烟花，處處紅樓賣酒家。
坐看浮雲橫玉壘，行觀流水盪金沙。
巴童棧道騎高馬，蜀卒城門射老鴉。
見說

近來多盜跖夜滾戰鼓不停過

聞父老談兵

昔聞天兵入西蜀鞞鼓亂搥裂巖谷金鞍戰馬踏雲梯日射旌旗紅簌簌黑霧壓城塵漲天西方殺氣成愁烟釣魚臺畔古戰場六軍戰血平三川天寒日落愁無色將軍一劍萬人敵婦女多在官軍中兵氣不揚長太息

督相公席上

燕雲遠使棧雲間便遣郛筒助客歡閃閃白魚來丙穴綿綿紫雀出巴山神仙縹緲艷金屋城郭繁華號錦官萬里橋西一回首黑雲遮斷劍門關

歌妓許冬冬攜酒郊外小集

益州歌妓許冬冬客裏相逢似燕鴻醉擁蜀琴抽白雪舞

迴班扇割西風山魚野饌荒山裏浪蘂浮花古寺中偶爾留連借餘景出門一笑夕陽紅

隆州

歇馬隆州借夕涼壺中薄酒似酸湯城濠借屋偏栽柳市井人家却種桑官逼稅糧多作孽民窮田土盡拋荒年來士子多羗役隸籍鹽場與錦坊

彭州

我到彭州酒一觴遺儒相與話淒涼渡江九廟歸塵土出塞三宮坐雪霜岐路茫茫空望眼興亡滾滾入愁腸此行歷盡艱難處明月繁華是錦鄉

彭州歌

彭州昔號小成都城市繁華錦不如尚有遺儒頭雪白見

人猶自問詩書

彭州又曰牡丹鄉花月人稱小雒陽自笑我來逢八月手
攀枯幹舉清觴

漢州

馬踏巉巖緩着鞭漢州城外看青天雲橫古嶂吞殘日風
捲崇岡起燒烟地拔翠峰森似筍溪明錦石小如錢官郵
足出門去信口語言詩未圓

綿州

綿州八月秋氣深芙蓉溪上花陰陰使君喚船復載酒書
生快意仍長吟擊鼓吹笙勸客飲脫巾露髮看日沉歸來
不知其所往但見月高松樹林

永康軍

錦城飛馬過青城無奈風聲更雨聲一夜不眠何似者籌
花賭酒到天明

萬州

槎牙鳥道没人烟狼虎交橫馬不前四面青山藏白跡萬
州城下草連天

重慶府

鐵作篙師鐵作舟風撞浪湧可無憂林間麋鹿遙相望峽
裏蛟龍橫不休目斷弔橋空峭峭頭昏伏枕自悠悠錦城
秋色追隨盡好處山川更一遊

涪州

曉立驗檣烏時聞鳥獸呼斯須風力健遮莫水程迂赤岸
日稠疊白鹽山獨孤眼前猶有險不盡更危途

廬州

復作廬州去輕舟疾復徐峽深藏虎豹谷暗隱樵漁西望
青羗遠南瞻白帝迂暗嵐侵簟枕寒露濕衣裾野沼荷將
盡山園荔已疎長官相見後置酒斫鯨魚

榮州

醉倚高樓上裁詩得五言蠶叢雲幕幕鳥道月昏昏妓女
吹金管庖丁洗玉盤客癡渾不寐府主更開樽

戎州

豪士家園爲我開樹頭樹底錦堆堆書生大嚼真快意不
枉戎州走一廻

錦荔戎州第一奇大如雞子壓枝垂金刀剪下三千顆對
客從容把酒卮

客馬勞人事已灰長安無復使人來滿園蓊蔚千千樹盡
是楊妃死後栽

錦樹高低種萬顆歲收百斛足生涯八錢買得一斤重魯
直詩中特地誇

錦殼中間玉一團樹高數丈實難攀廬戎顆顆甜如蜜夔
梓纍纍味薄酸

潼州歌

潼州待我洗吟眸如此江山是勝遊紅袖鬪歌纔拍手綠
鬟對舞盡纏頭篋篋急熱風生座鼙鼓連搗月上樓一夜
不眠雞戒曉又騎鋪馬過綿州

興元府

秋風吹我入興元下馬荒郵倚竹門詩句未成雲渡水酒

杯方舉月臨軒山川寂寞非常態市井蕭條似破村官吏
不仁多酷虐逃民餓死棄兒孫

利州

雲棧遙遙馬不前風吹紅樹帶青烟城因兵破慳歌舞民
爲官差失井田巖谷搜羅追獵戶江湖刻剝及漁船酒邊
父老猶能說五十年前好四川

隆慶府

雁山突兀插青天劔閣西來接劔泉如此江山快人意滿
船載酒下潼川

閬州

閬州城南海棠溪客子不可無新詩正嫌風攪浪花碎更
被雨衝雲葉垂野鷗出沒底心性山禽飛舞猶威儀江南

或問閬州景錦屏山水天下奇

鳳州

鳳州山館有清輝古木扶疎散陸離紅尾錦雞鳴古埭綠
頭花鴨盪幽池荷聲策策秋來後桂影團團月上時病馬
嚙芟思故櫪驚鳥遶樹宿何枝三分割據人如夢滿目興
亾客似癡走筆成詩聊紀實崑峩風土出蹲鴟

鳳州歌

鳳州南去是南岐大散橫盤勢更危躍馬紫金河畔路萬
枝楊柳撒金絲
去路迢迢入兩當三千三百到華陽黃花川上黃花驛千
百猿聲斷客腸

和人賀楊僕射致仕

蓮府公卿拜後塵手持優詔挂朱輪從軍幕下三千客聞
禮庭中七十人飾帳麗詞推北巷畫堂清樂掩南鄰豈同
王謝山陰會空叙流杯醉暮春

初庵傅學士歸田里

燕臺同看雪花天別後音書雁不傳紫閣笑談爲職長彤
闈朝謁在班前揮毫屢掃三千字把酒時呼十四絃聞已
挂冠歸故里尚多宣賜鈔成船

酬方塘趙待制見贈

久謂儒冠誤窮愁方棄書十年心不展萬里意何如司馬
歸無屋馮驩出有車吾曹猶未化爛醉且穹廬

酬隱者劉桃岡

食既彈長鋏囊懸少錯刀功名須汝輩詩酒且吾曹強項

貧而樂揚眉氣自豪北來魚字密南去雁書高擬折淵明
柳重尋夢得桃明珠忽委贖價重九方皋

曾平山招飲

老貌不隨俗固窮而隱居一塢百竿竹八窗千卷書酌以
旋芻酒薦之新網魚典盡出門去晚涼山雨餘

答林石田見訪

偶攜降幟立詩壇剪燭西窗共笑觀落魄蘇秦今席暖狂
猖阮籍尚羶寒山中客老千莖白海上人歸一寸丹世事
本來愁不得乾坤只好醉時看

答開先老子萬一山

廬山五老招我此行我琴不鼓無虧無成

萬安殿夜直

鳳御紫詔下雲端千載明良際遇難金闕曉明天表近玉
堂夜直月光寒宮衣屢賜恩榮重御宴時開禮數寬却憶
玄都人去後桃花零落倚闌干

張平章席上

兩鬢蕭蕭不耐秋興來今日謁公侯舞餘燕玉錦纏頭又
着紅鞵踢繡毬

題汪導像

秦淮浪白蔣山青西望神州草木腥江左夷吾甘半壁只
緣無淚灑新亭

浮丘道人招魂歌

有客有客浮丘翁一生能事今日終齒瓊雪容身不容寸
心耿耿摩蒼空睢陽臨難氣塞充大呼南八男兒忠我公

就義何從容名垂竹帛生英雄嗚呼一歌兮歌無窮魂招
不來何所從

有母有母歿南國天氣黯淡殺氣黑忍埋玉骨崖山側蓼
莢劬勞淚沾臆孤兒以忠報罔極披舌剖心命何惜地結
萋弘血成碧九泉見母無言責嗚呼二歌兮歌復憶魂招
不來長嘆息

有弟有弟隔風雪音信不通雁飛絕獨處空廬坐縲絏短
衣凍指不能結天生男兒硬如鐵白刃飛空肢體裂此時
與汝成永訣汝于何處收兄骨嗚呼三歌兮歌聲咽魂招
不來淚流血

有妹有妹天一方良人去後逢此殃黃塵暗天道路長男
呻女吟不得將汝母已歿埋炎荒汝兄跣足行雪霜萬里

相逢淚滂滂驚定拭淚還悲傷嗚呼四歌兮歌欲狂魂招
不來歸故鄉

有妻有妻不得顧饑走荒山汗如雨一朝中道逢狼虎不
甯偷生作人婦左掖虞姬右陵母一劍捐身剛自許天上
地下吾與汝夫爲忠臣妻烈女嗚呼五歌兮歌聲苦魂招
不來在何所

有子有子衣裳單皮肉凍死傷其寒蓬空煨燼不得安叫
怒索飯饑無餐亂離走窶千里山荆棘蹲坐膚不完失身
被繫淚不乾父聞此語摧心肝嗚呼六歌兮歌欲殘魂招
不來心鼻酸

有女有女清且淑學母曉粧顏如玉憶昔狼狽走空谷不
得還家收骨肉關河喪亂多殺戮白日驅人夜燒屋一雙

白壁委溝瀆日暮潛行向天哭嗚呼七歌兮歌不足魂招
不來淚盈掬

有詩有詩吟嘯集紙上飛蛇歎香汗杜陵寶唾手親拾滄
海月明老珠泣天地長留國風什鬼神護呵六丁立我公
筆勢人莫及每一呻吟淚痕濕嗚呼八歌兮歌轉急魂招
不來風習習

有官有官位卿相一代儒宗一敬讓家亡國破身漂蕩鐵
漢生擒今北向忠肝義膽不可狀要與人間留好樣惜哉
斯文天已喪我作哀章淚悽愴嗚呼九歌兮歌始放魂招
不來默惆悵

